

楚

辭

蒙

引

楚辭蒙引離騷卷之下

新安 汪瑗 玉卿

離騷篇

瞻前顧後一章

王逸曰前謂禹湯後謂桀紂言前觀湯武之所以興
顧視桀紂之所以亡足以觀察萬民忠佞之謀窮其
真僞也又曰言世之人臣誰有不行仁義而可任用
誰有不行信善而可服事者乎言人非義則德不立
非善則行不成也朱子曰前謂往昔之是非後謂將

來之成敗言瞻前顧後則人事之變盡矣故見民之計謀於是爲極而知惟義爲可用惟善爲可行也洪氏解計極句曰觀民之策於是爲至瑗按計極二字朱子之說得其旨矣洪氏以計字截屬上講而極字單言非是蓋相觀二字稍斷民之計極相連者也王說亦得其旨但只以忠佞言之又失之太泥又相觀二字卽承上句言瞻前顧後猶左顧右盼反復詳視云爾王逸朱子解前後二字亦滯又義善二句屈子是反說朱子是正解王逸獨以人臣講旣非是而其說亦失屈子立言之意人非義則德不立非善則行

不成二句說話好意亦近是但以義善二字分善德
行講又非也二句猶言無往而非義之所在吾人所
當體用無往而非善之所在吾人所當服行者也此
章本謂環顧博觀乎一世之人而機械變詐極其巧
僞貪利爲惡之心靡有底止曾不知徙義遷善務脩
德行以承皇天錯輔之意也承上章而泛言之則所
以責當時之君臣勵自己之節義而湯武桀紂之興
亡古今之是非成敗具見於言表矣指而實之則狹
矣或又解下二句曰孰有非義之事而可用者乎孰
有非善之行而可服者乎其說雖通要非屈子立言

之本意

貼

王逸曰貼猶危也或云貼近也言已盡忠近於危殆
洪氏曰貼臨危也小爾雅曰疾甚謂之貼前漢註云
貼近邊欲墮之意瑗按此字不經見諸說意俱是但
語有詳畧之不同竊意當從漢註意自詳明朱子集
註兼洪氏漢註而用之

覽余初

王逸曰上觀初世仗節之賢士我志所樂終不悔恨
五臣曰今觀我之初志終竟行猶未悔瑗按五臣是

而王說非

量鑿正柄

王逸但註曰柄所以充鑿既無音釋又不詳所以洪氏曰鑿音漕穿孔也瑗按所謂捶鑿斧鑿之鑿乃是器具之名字全實也所謂杜撰穿鑿及匡衡鑿壁之鑿乃是物有不通而用別物以穿通之之名字全虛也俱讀作入聲此所謂鑿音漕乃是所穿通孔隙之名字半實半虛也當讀作平聲洪氏曰柄而銳切刻木端所以入鑿音漕瑗按柄從木旁內外之內與柄字不同柄字從木旁丙丁之丙要之柄卽柄之別名也洪

氏之意蓋以柄爲總號而柄者乃柄頭之削而尖小處故曰刻木端所以入鑿音者音也明非柄之通稱也或曰鑿音卽斧鑿之鑿柄卽柄字之訛也未知是否姑誌之朱子曰正謂審其正而納之也是矣王逸曰正方也言工不量度其鑿而方正其柄則物不固而木破矣詞不別白未知所謂竊思其意似是謂工匠之用鑿柄不量度相視而執持使之端方正直則鑿柄必爲所損壞也是王逸以鑿卽爲斧鑿之鑿矣其所言鑿義與或說同未知是否而解量正之意則非是矣又按九辨云圓鑿音而方柄今吾固知其鉏鋸

而難入是言其孔圓其柄方故不相入也淮南子云
良工漸尖音乎矩鑿音之中是又言其孔方也今觀之
匠氏所斫之斧頭其孔皆方而所捶打之鑿則孔又
多圓者然則九辯之文固當以圓鑿音方柄爲解此
處或圓鑿音而方柄或方鑿音而圓柄皆不可知泛
講爲是

茹蕙

王逸曰茹柔熨也五臣云茹臭也洪氏曰玉篇云茹
柔也一曰茹菜五臣以茹爲香誤矣呂氏春秋曰以
茹魚驅蠅蠅愈至而不可禁則茹又爲臭敗之名非

香也瑗按詩曰柔則茹之是茹有柔義王逸之說朱子從之及洪氏之辯皆是但今亦自別有茹草詩曰茹蘆在阪是也其草可以染絳絳紅色也或曰蕙恐是蘆字字相似而訛也蓋茹蘆可染紅色以爲泣血之比瑗按或說雖有理但覺奇巧未敢盡信姑附之以備好古君子一覽云

襟

洪氏曰爾雅曰衣皆謂之襟襟交領也瑗按衣裳之邊際皆謂之襟此所謂襟者蓋指胷前之衣而洎下垂以濕之耳俗所謂胷襟是也

陳辭

王逸曰陳辭於重華道昇澆以下也是矣而又曰俛首自念仰訴於天以陳舜爲訴天非是

耿

耿洪氏謂中正之道耿然甚明是矣此句乃倒文本謂吾旣得此耿然中正之道耳如余固知蹇蹇之爲患余旣滋蘭之九畹余雖好脩姱以鞿羈等句乃順言之也如汨余若不及願竦時乎吾將刈蹇吾法夫前脩旣替余以蕙纒忱鬱悵余侘傺延佇乎吾將反其餘與吾字雖皆倒在下而意乃當在句首之上也

此類甚多王逸乃謂中心曉明得此中正之道五臣云明我得此中正之道朱子云耿然自覺吾心已得此中正之道俱非文意

乘鷖

乘鷖與乘虬同王逸以爲設詞是也又謂鷖身有五彩而文以爲車輪非是若下文雜瑤象以爲車乃是謂以瑤象飾車耳此駟虬乘鷖朱子直以乘龍跨鳳解之是矣

溘埃風

言已忽然出乎塵埃濁風之外而往上征耳洪氏曰

忽然風起而余上征朱子曰埃風忽起而遂上征似謂乘此埃風而上征也非是又其所以上征者王逸曰去離世俗遠群小也似矣又曰得此中正之道精合真人神與化游故云云朱子亦曰得此中正之道上與天通無所間隔故云云其說太深迂遠不切俱非文意本旨又按溘字離騷篇凡三見前後王逸皆解作猶奄也此處又解作猶掩也謂掩塵埃而上征洪氏辨之曰逸是因遠遊篇掩浮雲而上征故解作掩也還當作奄忽之義洪之辯是

寓言總論

朱子辯證曰此篇所言陳詞於舜及上欵帝閭歷訪神妃及所言鸞鳳飛騰鳩鳩爲媒等語其大意所比固皆有謂至於經涉山川驅役百神下至飄風雲霓之屬則亦泛爲寓言而未必有所擬倫矣王洪二註類皆曲爲之說反害文義至於懸圃閬風扶桑若木之類亦非實事不足考信今皆畧存梗概不復盡載而詳說也援按朱子之辯甚得本旨足以破二家之曲說但就舜陳詞雖爲寓言而所言者皆爲實事至於欵帝閭以下直如後世郭景純等游仙之詩遣興之辭耳與陳舜之辭又稍不同讀者詳之

軻

王逸曰軻搢輪木也搢一作支音義並同洪氏曰戰國策云陛下嘗軻車於趙矣軻止車之木將行則發之五臣以軻爲車輪誤矣瑗按朱子從王洪之說是也

蒼梧

王逸曰蒼梧舜所葬也言巳朝發帝舜之居前濟沅湘以南征句下又註曰舜葬於九疑山在沅湘之南故欲渡沅湘之水南行就舜洪氏曰山海經云蒼梧山舜葬於陽帝丹朱葬於陰禮記曰舜葬於蒼梧之

野註云舜征有苗而死因葬焉蒼梧於周爲南越之地今爲郡如淳曰舜葬九疑九疑在蒼梧馮乘縣故或曰舜葬蒼梧也瑗按據禮記山海經蓋舜葬於蒼梧據如淳則舜葬於九疑王逸又兩言之又按山海經曰蒼梧之丘其中有疑山焉舜之所葬文穎曰九疑山半在蒼梧半在零陵顏師古曰文說是也春陵圖志九疑山亦名蒼梧山詳其意舜實葬九疑山而云蒼梧者總名耳馮乘縣去九疑甚遠如淳之說非也至於屈子所言本旨要不指舜葬因王逸之說有據故諸家從其說詳見本註茲不再贅或曰九疑山

者謂其山有九形勢皆相似人視者多疑惑不能別
故因以名山李白詩九疑聯綿皆相似是也蒼梧山
者謂其山多蒼梧之樹故因以名也蒼黑色也梧梧
桐也蒼梧者猶後世言碧梧耳此無係文義亦覽者
所當知疑後人作疑失其義矣非是瑗又嘗讀李白
遠別離曰或言堯幽囚舜野死九疑連縣皆相似重
瞳孤墳竟何是蓋李白以舜死蒼梧與堯幽囚並言
而且疑葬於九疑之非亦有所見也學者不可不知
苟知舜未必葬於蒼梧則屈子所謂發軔蒼梧者又
可以知其不必指舜言也又按孟子曰舜生於諸馮

遷於負夏卒於鳴條東夷之人也觀孟子叙述之詳
悉如此蓋必有據可以破舜未嘗野死於蒼梧而葬
於九疑也禮記檀弓亦云者蓋禮記乃漢儒附會之
書而檀弓二篇尤爲純駁相半註禮者正當據孟子
以闡其非而乃謂天子以四海爲家故南巡而死因
遂葬焉甚謬矣至若九疑有舜塚者又安知非舜之
死而南方思之因爲假塚而吊祭之以慰其思慕之
心不意後人遂以爲真塚也觀山海經於聖賢之塚
處處載之亦可見矣

懸圃

王逸曰懸圃神山也在崑崙之上淮南子曰崑崙懸圃維乃通天言已夕至懸圃之上受道聖王而登神明之山洪氏曰山海經云槐江之山上多琅玕金玉其陽多丹粟陰多金銀寶維帝之平圃南望崑崙其光熊熊其氣魂魂西望大澤后稷所潛平圃卽懸圃也穆天子傳云春山之澤清水出泉溫和無風飛鳥百獸之所飲食先王之所謂懸圃水經云崑崙說曰崑崙之山三級下曰樊桐一名板松二曰玄圃一名閼風上曰層城一名天庭淮南子言傾宮旋室懸圃涼風樊桐在崑崙閼闔之中樊音飯又曰崑崙之丘

或上倍之是謂涼風之山登之而不死或上倍之是
謂懸圃之山登之乃靈能使風雨或上倍之乃維上
天登之乃神是謂太帝之居東方朔十洲記曰崑崙
之山有三角一角正北上于北辰星之耀名閼風巔
其一角正西名曰玄圃臺其一角正東名曰崑崙宮
玄與懸古字通天問曰崑崙玄圃其居安在瑗按淮
南子十洲記俱以懸圃閼風並言此下又有登閼風
而縹馬之句則懸圃閼風之爲二山也明矣懸圃一
名平圃一名玄圃懸與平其義相近懸與玄其音相
同洪氏又謂玄與懸古字通用則曰懸圃曰玄圃曰

平圃之爲一山也明矣水經以玄圃一名閼風非也據山海經則懸圃亦可謂之槐江也要之皆是寓言本無是山也或曰據山海經懸圃在崑崙之北據十洲記懸圃在崑崙正西雖未知其審蓋此等名目當是大崑崙諸支山之號未必絕無是山而妄言之者但以絕遠無人常到故後世浪傳以爲神仙之所居耳天問曰崑崙懸圃其居安在蓋闢後世其上有瓊宮璇室神仙往來之說也曰非也屈子已明言崑崙懸圃其居安在矣烏得謂其真有是山也其說詳見後崑崙條下又按王逸解天問謂懸圃上與天通朱

楚辭卷之四 高唐賦
子辯證言懸圃閔風之說皆爲寓言是矣及自証上
跪敷衽章又曰吾心旣得此中正之道上與天通無
所間隔所以埃風忽起而遂乘龍跨鳳以上征也其
上與天通二句又未免竊淮南子王逸之意以解之
非是

靈瑣

王逸曰靈以喻君瑣門鑊也文如連瑣楚王之省閣
也一云靈神之所在也瑣門有青瑣也言未得入門
故欲少住門外瑣一作璫五臣云瑣門閣也洪氏曰
上文言夕余至乎懸圃則靈瑣神之所在也神之所

在以喻君也漢舊儀云黃門今日暮入對青瑣丹墀
拜音義云青瑣以青畫戶邊鏤也朱子曰靈神也瑣
門鏤也文如連瑣以青畫之則曰青瑣辯證曰王逸
以靈瑣爲楚王省閣非文義也瑗按此章上二句言
已去楚遠遊之意第二句言已欲留楚不忍去之意
第四句言已不得不遠遊之意謂少留者謂欲少留
於楚也非謂欲少留於懸圃也洪氏以靈瑣爲懸圃
神靈之門鏤非是王逸以爲楚王省閣之門鏤文如
連瑣是也但獨以靈爲喻君失之滯矣蓋靈者贊美
之詞如靈氛者亦可謂之靈耳靈瑣者蓋總指朝廷

之所在寄意於君也但以靈爲懸圃之神以靈瑣爲懸圃神之所在甚謬而王逸所引或言未得入門故欲少住門外亦非也又按屈子只言靈瑣其當時楚王門鏤之所畫或丹或青皆不可知而所謂青瑣者自是漢儀也王逸引或言青瑣及洪氏引漢儀特證瑣字之義朱子并採之以釋屈子之靈瑣非是嘗聞之師曰王逸之說爲是屈子蓋謂欲少淹留楚朝以行吾道而楚王不用苟不遠遊以求賢君則日將暮矣可見屈子之欲觀四荒而覽四極者非忘君也君之不用不得已也

羲和

王逸曰羲和日御也洪氏曰山海經云東南海外有
羲和之國有女子名曰羲和是生十日常浴日於其
洲注云羲和天地始生主日月者也故堯因是立羲
和之官以主四時虞世南引淮南子云爰止羲和爰
息六螭是謂懸車注云日乘車駕以六龍羲和御之
日至此而薄於虞淵羲和至此而迴弭止也朱子曰
羲和堯時主四時之官賓日餞日者也辯證又曰王
註以羲和爲日御補註又引山海經云云此等虛誕
之說其始止因堯典出日納日之文口耳相傳失其

本旨而好怪之人耻其謬誤遂乃增飾傳會必欲使之與經爲一而後已其言無理本不足以欺人而古今文士相承引用莫有覺其妄者爲此註者乃不信經而引以爲說蔽惑至此甚可歎也瑗按朱子之辯甚爲有理抑考書經註曰羲氏和氏主曆象授時之官徵之堯典正文則羲和爲二氏無疑瑗嘗求其命官之義亦必有說也堯典以羲仲羲叔主春夏二仲之職和仲和叔主秋冬二仲之職蓋羲與曦同古文省耳蓋春夏之日其色燁燁其氣燠蒸故曰羲也羲者言日之暄曦也秋冬之日其色微淡其氣漸平故

曰和也和者言日之平和也是羲和二字亦本日羲以命名而爲主曆時之官之號也其以爲日御者蓋亦借羲和之官名以爲日御名耳天問云羲和之未揚若華何光是以羲和爲日也後世作詩者直以羲和爲日焉要亦無害也山海經及淮南之註固爲謬妄無疑而王逸之註則是也屈子之所用羲和與望舒飛廉等號一也如以羲和不爲日御則望舒亦不當爲月御飛廉亦不當爲風伯矣朱子奚爲後二說從之而獨不從羲和之說邪若以爲堯主四時之官又焉能使日不望崦嵫而迫也或曰此蓋寓言耳曰

惟其寓言此所以解作日御無妨也由此觀之則羲和可以爲官名可以爲日名可以爲日御名但以爲女子之名始生日月者則妄誕之甚不待智者可辯矣

咸池

援按咸池但只取引馬於咸池之水猶詩言秣其馬之意言飲其馬將以啓行耳王逸曰咸池日所浴處也飲馬於咸池與日俱浴以潔已身非是洪氏引咸池爲星名天神之名皆無關此句立言本意也

若水

王逸曰若木爲崑崙西極其華照下地洪氏曰山海經南海之內黑水之間有木名曰若木若水出焉又曰灰野之山有樹青葉赤華名曰若木日所入處生崑崙西附西極也然則若木有二而此乃灰野之若木歟淮南子曰若木在建木西上有十日其華照下地注云若木端有十日狀如連珠華光也光照其下也一云狀如連華天問云羲和之未揚若華何光瑗按李白古風曰朝弄紫沂海夕披丹霞裳揮手折若木拂此西日光齊賢引洪註以解之士贊註曰此乃遊仙詩恣意大言倏而東忽而西政不辯是何處若

木也屈子此章及天問之言或指東若木如淮南之說歟洪氏以爲灰野之若木容更詳之

逍遙相羊

王逸曰逍遙相羊皆遊也洪氏曰逍遙猶翱翔也相羊猶徘徊也瑗按後曰聊浮游以逍遙又曰聊浮游而求女諸家無訓但以遊戲娛樂字樣帖之其意是矣吾嘗求其說而不得也淮南子天文訓上篇曰東南爲常羊之維註曰常羊不進不退之貌東南純陽用事不盛不衰常如此故曰常羊之維其說是也所謂相羊者其義亦如此也蓋羊性好群而抵戲故易

兌卦爲羊兌者悅也兌之爲羊則羊之爲悅樂之意可知矣羊有名羴者延佇之義也亦有名羴者愉悅之義也相羊之說昭昭矣然何以謂之相羊也蓋本曰常羊也故有作尚羊者尚爲常字之上截古通也或有名彷徨者蓋因其字音相近而後人不得其義以意傳寫或相或仿或羊旁加立人耳不然則相者並也仿者彷徨也謂悅樂之意與羊相同而彷徨徘徊之戲亦如羊也要之作常羊尚羊者是也浮游者卽蜉蝣也其虫好浮游於水上一作遨遊者遊卽蜉虫遨卽鰲也天問亦曰鰲戴山林蓋鰲好舞抃之獸

也詳見羅氏爾雅翼或曰卽謂鰲魚之遊戲耳遊無
取於蚌也亦通是浮游者取義蟬蚌也遨遊者取義
於鰲也相羊者取義於羊也翱翔者取義於鳥也而
獨所謂逍遙者不得其義嘗按詩曰風雨所標搖莊
子曰搏扶搖而上者九萬里爾雅曰飈風謂之扶搖
然則所謂逍遙者或卽所謂扶搖標搖之說蓋漂泊
搖動不定之義亦浮游遨遊之義也諸家訓作遊戲
娛樂之意是矣因備錄其所名之義以俟博雅者改
訂焉又按此等字皆如猶豫狐疑之類非無意義者
學者詳之

望舒飛廉等號

朱子辯證曰望舒飛廉鸞鳳雷師飄風雲霓但言神靈爲之擁護服役以見其仗衛威儀之盛耳初無善惡之分也舊註曲爲之說以月爲清白之神風爲號令之象鸞鳳爲明智之士而雷獨以震驚百里之故使爲諸侯皆無義理至以飄風雲霓爲小人則夫卷阿之言飄風自南孟子之言民望湯武如雲霓者皆爲小人之象也邪又曰王逸又以飄風雲霓之來迎已蓋欲已與之同旣不許之遂使聞見拒而不得見帝此爲穿鑿之甚不知何所據而生此也瑗按朱子

二說俱是

雷師

王逸不註所以洪氏曰春秋合議圖云軒轅主雷雨之神一曰雷師豐隆也瑗按朱子以雷師爲豐隆非是予辯於後茲不贅

霓

辯證曰沈約郊居賦雌霓霓連蜷讀作入聲司馬溫公云約賦但取聲律便美非霓不可讀爲平聲也故今定雌霓雲霓爲平聲九章遠遊爲入聲蓋各從其聲之便也瑗按曹子建七啓曰慷慨則氣成虹霓蜺與

義藝際世韻相協是覓亦讀作去聲若今遠遊讀作平聲未爲不便凡楚辭中所言覓者俱爲平聲可也字一也義一也楚辭所用覓又非如七啓及郊居賦之協韻者比也奚爲一側而一平平遠遊讀作平聲聲律亦自便美讀者詳之

夜御

洪氏曰御讀若迓瑗按御卽古之迓字通用也詩曰以御於家邦今協韻御字以右旁卸字讀之則與夜相協矣卸音謝

閨風

淮南子作涼風蓋閩與涼字聲相近而有一誤也未
知孰是大抵此名皆寓言本無是山觀此曰白水曰
春宮可以知其皆非實有是處而爲寓言也審矣說
已見前懸圃條下茲不贅

高丘無女

朱子辯證曰舊註以高丘無女下女可詒皆賢臣之
譬非是下女說見於九歌可考也瑗按王逸以靈脩
美人媿於君處妃佚女譬賢臣朱子前以辯之謂處
妃佚女便是美人不當更立他義故集註於哀高丘
遊春宮求處妃見佚女留二姚之屬皆解爲求賢君

之意其說甚是及於後閨中遂遠章又註曰言此以
比上無明王下無賢伯其所謂賢伯者蓋指處妃之
屬賢伯猶賢臣也其說又自相矛盾讀朱子集註者
不可不知

佩詒

舊註佩協音備詒協音異瑗按詩青青子佩與思來
二韻相協則此亦可以佩字協作蒲眉反而詒平聲
讀亦可也古之協韻多以一字正讀爲主而以一字
協之不應二韻俱反其正音也或曰凡協韻者要以
上韻爲主而下韻協之耳若以佩爲主而詒不可協

故兩字俱轉其本音也曰若以佩韻如字讀則詒字亦可協作耐音如前能佩二韻是也奚不可協邪或曰詒何可協爲耐也曰詒亦可讀作胎音胎轉協而爲耐何不可之有也

豐隆辯

楚辭言豐隆者凡三見王逸皆以爲雲師而九歌雲中君亦註云雲神豐隆也朱子於離騷遠遊註爲雷師於九章思美人又註爲雲師亦莫能定及考他書又多作雷師且引雲漢之詩以證之曰蘊隆蟲蟲蓋蘊隆自是言暑氣蘊蓄而隆盛耳未見其爲雷也又

引淮南子以證之曰季春三月豐隆乃出以將其雨
註淮南者亦曰豐隆雷也觀其本文亦未見其爲雷
也下文曰至秋三月青女乃出以降霜雪註曰青女
主霜雪之神也依此例解則豐隆當作雨師非雷師
也上文雖有冬雷其鄉之句自是屬上章而與下文
絕不相蒙也又何以知豐隆爲雷師乎至張衡思玄
賦曰豐隆軫其雷霆兮列缺燁其照夜則平子明以
豐隆爲雷師矣穆天子傳云天子升崑崙封豐隆之
葬郭璞云豐隆筮師御雲得大壯卦遂爲雷師郭璞
之註蓋本之歸藏歸藏云豐隆筮雲氣而告之推原

歸藏之意則雲師也非雷師也郭璞蓋以其得大壯卦而信其爲雷師而遂失御雲之旨也瑗平生讀書恒多疑且見書最少不知尚別有所據否然以楚辭本文旨意詳之則當作雲師爲是洪氏亦曰豐隆或曰雲師或曰雷師其說不同據楚辭則以豐隆爲雲師得之矣離騷曰吾令豐隆乘雲兮求宓妃之所在思美人曰願寄言於浮雲兮遇豐隆而不將遠遊曰召豐隆使先導兮問太微之所居是亦承上句掩浮雲而上征而來也詳此三言則不待王逸之註洪氏之辯而豐隆之爲雲師章章矣或曰諸家訓詁容有

未審然則淮南張衡郭璞之說亦非與曰非也嘗考
月令仲春雷乃發聲仲秋雷始收聲其發其收皆在
仲月不在季月也淮南子季春三月豐隆乃出以將
其雨安知其非雲行雨施之謂乎奚必雷而後雨也
至若張平子郭景純則是仍襲舊說而未之深考耳
顧朱子之註楚辭或爲雷師或爲雲師而隨文遷就
已無一定之說瑗何敢執王洪之註而遂自信無疑
乎要之解屈子之書則當俱作雲師爲是而不當二
三其說也於是乎辯

處妃

王逸曰處妃神女也以喻隱士五臣曰處妃洛水神
以喻賢臣洪氏曰漢書古今人表有宓羲氏宓音伏
字本作處顏氏家訓書證篇曰張揖云宓今伏羲氏
也孟康漢書古文注亦云宓音伏而皇甫謐云伏羲
或謂之宓羲按諸經史緯候遂無宓羲之號處字從
虍音呼宓字從宀音綿下俱爲必末世傳寫遂誤以處爲
宓而帝王世紀因誤更立名耳何以驗之孔子弟子
處子賤爲單父宰卽處音處之後俗字亦爲宓或復加
山今兗州永昌郡城舊單父地也東門有子賤碑漢
世所立乃云濟南伏生卽子賤之後是知處之與伏

古來通用誤以爲宓較可知矣洛神賦注云宓妃伏
羲氏之女溺洛水而死遂爲河神朱子辯證曰處妃
一作宓妃說文處房六反虎行貌宓美畢反安也集
韻云處與伏同處羲氏亦姓也宓與密同亦姓俗作
密非是補註引顏之推說云云此非大義所繫今亦
姑存其說以備參考璦按處古伏通用無疑又處之
與宓誠爲傳寫之誤但以處子賤爲伏羲之後又以
伏生爲處子賤之後恐未必然惟其如此故又以處
妃爲伏羲氏之女遂以下蹇脩爲伏羲氏之臣也孔
子刪述六經唐虞以上蓋已不得其詳矣又安所考

處妃爲伏羲氏之女乎此亦不足信也王逸以神女
釋之似矣至於隱士賢臣之喻又皆非是

屏翳辯

屏翳之字不見楚辭正文天問曰萍號起雨何以興
之王逸註曰萍萍翳雨師名也號呼也興起也言雨
師號呼則雨從而興起也朱子註曰萍一作莽一作
萍而仍其舊說遠遊曰左雨師使徑待朱子未有釋
王逸曰告使屏翳備不虞也是萍又一作屏嘗考屏
翳之名韋昭曰雷師也虞喜志林曰雨師也雷師之
說不知其何所據而以爲雨師者多本之天問也山

海經亦曰屏翳在海東時人謂之雨師大象賦云太白降神於屏翳註云其精降爲雨師之神博雅亦作屏翳張景陽詩云豐隆迎號屏顏師古云屏翳一曰萍號張景陽實用萍號而曰號屏以萍與屏通而又倒文以協韻耳曹子建洛神賦曰屏翳收風川后靜波是又以爲風伯也張衡思玄賦曰雲師躡以交集註曰雲師并翳也是萍又一作并以爲雲師也五臣註楚辭亦曰豐隆雲神雲神屏翳大人賦云召屏翳誅風伯刑雨師註云屏翳天神使也按屏翳或曰雷師或曰雲師或曰雨師或曰風師或曰天使衆說紛

紛多無明據註文選者云當以子建爲正註楚辭者
又引天問謂屏翳爲雨師耳瑗竊思之亦未必然妄
意以爲雲師者其或是乎或曰雲師子旣以爲名豐
隆矣豈又名屏翳邪曰無傷也如風伯旣名飛廉矣
又有名巽二者又有名八姨者又有名少女者如月
御旣名望舒矣又有名織阿者又有名姮娥者素娥
者各有所據也或曰以屏翳爲雲師又何據乎曰惟
無所據此所以衆說紛拏訖莫能定也吾惟據其本
文字義而知其爲雲師者之說長也蓋屏者障護之
義翳者擁蔽之義其勢之布濩彌漫而能障蔽乎日

月宇宙者其惟雲乎吾以是信其爲雲師也或曰子以屏翳爲雲師其說長矣而以豐隆爲雲師其義何居曰豐豐隆隆雲盛貌也其義益易明矣又何疑乎或曰然則天問之所謂萍者抑又何邪曰瓊嘗疑註此者之未深思也夫天問之言皆是相傳有是語而事理有未安者故屈子怪而問之若以萍爲雨師則兩師號而雨隨起此固事理之常無可疑者又何必以爲異怪而問之乎或曰然則何謂也曰自王逸博雅之學朱子窮理之精已不能明而皆仍舊說顧予小子何足以知此亦嘗就本文字義而思之萍一作

萍是也夫萍者積雨之所生是雨必有萍而以萍爲起雨者如虹霓出而雨止孟子不言大旱之望雨而言大旱之望虹霓者蓋雨必有虹霓也以萍爲起雨者其說如此或曰如子之言亦事理之常者又何足怪乎曰其事本如此而當時楚俗不察其義遂有萍號起雨之恒言故屈子怪而問之曰焉有萍能號呼以起雨乎萍之起雨事理之常也萍之號呼而起雨此所以爲可怪也家語載楚王過江得萍實大如斗赤如日萍而至於有實實而至大於斗則萍之盛可知矣則楚之多萍可知矣則萍號起雨爲楚俗之恒

言又可知矣若如此解或者愚人千慮之一得乎又嘗聞之師曰萍號起雨號字當作去聲讀蓋楚人名其萍爲起雨故屈子怪其義而問之言萍何能與雨邪是又一說因併附之

結言

瑗按離騷曰解佩纒以結言情誦曰固煩言不可結而詒抽思曰結微情以陳辭思美人曰言不可結而詒洪氏引洛神賦云願誠素之先達兮解玉佩而要之亦此意朱子惜誦篇註曰疑古者以言寄意於人必以物結而致之如結繩之爲也瑗按解佩纒者猶

恭敬者幣之未將者也之意非有所比喻於其間也
洪氏引洛神賦以明之是矣朱子之說看得結字太
深結言者猶所謂綴文續文葺辭博辭等字耳非因
佩纒之說而用結字也讀者當以意會可也

蹇脩

朱子辯證曰王逸以處妃喻隱士既非文義又以蹇
脩爲伏羲氏之臣亦不知其何所據也又謂隱者不
肯仕不可與共事君亦爲衍說瑗按朱子旣闢王逸
以蹇脩爲伏羲氏之臣之非則以處妃爲伏羲氏之
女者亦無所據也集註又用之亦非是洪氏曰處妃

伏羲氏之女故使其臣以爲理也安有求伏羲之女而乃使伏羲之臣以爲媒者乎此雖設言蓋亦欲要諸理耳豈可爲不情之說邪因一處字而遂支離其說以至於此甚可怪也

在理

朱子集註曰在協才里反或曰在如字卽理協音賴上聲辯證又曰孟子不理於口漢書無俚之至說者皆訓爲賴則理固有賴音矣瑗按此韻可兩協若以在字爲主如字讀則理去其左旁上畫爲埋字埋轉作去聲讀則亦有賣音也若理字爲主如字讀則在

字去其上畫爲仕字又可與理協矣古之協韻多以
偏旁讀考之可見

緯繡

緯音徽一正作徽繡呼麥反又音畫一作畫洪氏曰
博雅作敦懼廣韻作徽繡瑗按作緯繡是矣舊皆解
作垂戾之意非是蓋纏綿繚繞之意也以垂刺解之
雖得此句立言之旨而失此二字之義所謂意近是
而語則疎也此二句蓋卽仗衛服役而言以見已意
耳言已紛總總其離合而急於求合如此然仗衛服
役一離一合之間反爲繚繞相結不得遷徙前進以

言已方急於求進而又擇視賢君故難合也舊註解紛總總其離合與前章直以人之情意言之非是

窮石洧盤

王逸曰淮南子曰弱水出於窮石入於流砂也禹大傳曰洧盤之水出崦嵫之山洪氏曰郭璞註山海經云弱水出自窮石窮石今之西郡刪丹蓋其別流之原淮南子注云窮石山名在張掖也左傳曰后羿自鋤遷於窮石朱子亦曰窮石在張掖卽后羿之國也瑗按禹貢弱水西流觀淮南與山海經弱水出自窮石則窮石之山在東也洧水出自崦嵫崦嵫乃日所

入處卽前望崦嵫而勿迫是也則洧盤之源乃在西也郭璞以窮石爲西郡非是又按晉地記云河南有窮谷盖本有窮氏所遷也則屈子之所謂窮石恐是淮南子山海經之所謂窮石而非有窮氏所遷之窮石也其名偶同耳淮南山海經二註俱以爲有窮氏之窮石失之矣有窮氏之國在河南二家所言之窮石在張掖張掖乃居延屬國與西海流沙相近也又按淮南地形上篇曰東南方曰大窮盖地不滿東南是東南方地之窮盡處也故曰大窮而屈子之所稱窮石者其或指此也歟盖旣遊東方之春官無所遇

因遂歸次於窮石耳洧盤者亦東方之水也蓋次言其山濯言其水也未知其審姑誌之以俟博雅

四極

洪氏曰爾雅云東至於泰遠西至於邠國南至於濮
鉉北至於祝栗謂之四極邠說文作汾汾西極之水
也又淮南子云東方東極之山曰開明之門南方南
極之山曰暑門西方西極之山曰闔闔之門北方北
極之山曰寒門朱子辯證曰爾雅說四極恐未必然
邠國近在秦隴非絕遠之地也瑗按爾雅之說雖未
必然其所言地名猶有指實若淮南四門之名乃寓

言耳大抵屈子所言四極猶言四方耳觀其下所指不過有城有虞二國可見朱子又曰舊說有城國在不周之北恐其不應絕遠如此史記正義曰有城當在蒲州也蓋古人之文不可拘拘而視之今按虞國史記索隱曰在河東太陽縣括地志曰故虞城在陝州河北縣鄜元註水經曰幹橋東北有虞城雖所言不同要亦非絕遠之地也

佚女

王逸曰佚女帝嚳之妃契母簡狄也配聖帝生賢子以喻貞賢也詩曰有娥方將帝立子生商呂氏春秋

曰有娥氏有美女爲之高臺而飲食之言已望見
臺高峻睹有娥氏之美女思得與共事君也李善引
呂氏春秋曰有娥氏有二佚女爲九成之臺淮南子
曰有娥在不周之北長女簡翟少女建疵註云姊妹
二人在瑤臺也朱子辯證曰舊說言求佚女爲求忠
賢與共事君亦非瑗按史記曰殷契母曰簡狄有娥
氏之女爲帝嚳次妃是翟與狄通有娥之長女帝嚳
之次妃也然舊註不獨言求忠賢與共事君非也屈
子之意直取佚女之美以喻賢君耳無關於嚳與契
也王逸乃謂配聖帝生賢子以喻貞賢是屈子之所

以取佚女者不在佚而在譽契也非是又望瑤臺而
媒佚女猶遊春宮而求處妃耳瑤臺設言耳蓋謂佚
女登瑤臺之上而已得以望見之也呂氏春秋爲九
成之高臺而飲食之之說及淮南之註因楚辭而附
會之者也又屈子以有娥之女爲高辛之妃徵之詩
與史記是也史記索隱曰譙周云契生堯代舜始舉
之必非譽子以其父微故不著名其母娥氏女與宗
婦三人浴於川玄鳥遺卵狄吞之則簡狄非帝譽
次妃明也瑗考諸史傳契與堯兄弟也皆帝譽之子
至舜始舉之而佐禹者蓋當堯之時其年尚幼而德

未成故堯未大用之耳堯至於禹年代亦不甚遼遠
譙周謂契生堯代而舜始舉之疑非鬻子非也吞卵
之說詳見史記及商頌註茲不贅焉

鳩

洪氏曰廣志云鳩鳥大如鴉紫綠色有毒食蛇蝮雄
名運日雌名陰諧以其毛歷飲卮則殺人由此觀之
則鳩有雌雄其名不同皆可殺人而屈子只言鳩者
泛用之也王逸朱子獨以運日釋之非是二註蓋因
下言雄鳩故推此當言運日亦宜雄耳殊不知鳩惡
其鳴逝故以雄言之而鳩但取誤中其毒故只言鳩

可也然雌鳩非不鳴逝也雄者則尤佻巧也是故解鳩者當從洪氏雌雄並言之爲善運與暉同

鳩

洪氏曰鳩鶻鶻也爾雅云鶻鶻鶻鶻註云似山鶻而小短尾青黑色多聲月令鳴鳩拂其羽卽此也瑗按鶻有數種詩宛彼鳴鶻朱子註曰班鶻也是不獨鶻鶻能鳴也鶻巢詩朱子註但曰鶻鳥名性拙不能爲巢然則此屈子之所謂鶻者亦泛言之可也

鳩鶻取喻

朱子辯證曰鶻及雄鶻其取喻爲有意且文可見註

於他說亦欲援此爲例則鑿矣補註又引淮南說運
日知晏則鳩乃小人之有智者故雖能爲讒賊而屈
原亦因其才而使之是以屈原爲真嘗使鳩媒簡狄
而爲所賣也其固滯乃如此甚可笑也瑗按前叙遠
遊仗衛服役之虬龍鸞鳳飄風雲霓誠無比喻此言
鳩鳩鳳凰則非全無比喻者也洪氏之說亦是釋屈
子取喻之意未嘗真謂屈子使鳩媒簡狄也又未嘗
謂知其爲讒賊而復用之也洪氏之說今採附集解
可考朱子之辯非洪氏本意

猶豫

洪氏引顏氏家訓書證篇曰禮云定猶豫決嫌疑離
騷曰心猶豫而狐疑先儒未有釋書案尸子曰五尺
犬爲猶說文云隴西謂犬子爲猶吾以爲人將犬行
犬好豫在人前待人不得又來迎候如此往還至於
終日斯乃豫之所以爲未定也故稱猶豫或以爾雅
曰猶如鹿善登木猶獸名也旣聞人聲乃豫緣木如
此上下故稱猶豫狐之爲獸又多猜疑故聽河水無
流水聲然後渡今俗云狐疑虎卜則其義也此上顏氏之說
水經引郭緣生述征記云河津水始合車馬不敢過
要須狐行云此物善聽水下無水乃過人見狐行方

渡按風俗通云俚語稱狐欲渡河無如尾何且狐性
多疑故俗有狐疑之說未必一如緣生之言也然禮
記曰決嫌疑定猶豫疏云猶是獲屬豫是虎屬說文
云豫象之大者又老子曰豫兮若冬逝川猶兮若畏
四鄰則猶與豫皆未定之辭此上洪氏引諸說而斷之者也瑗按朱
子從顏氏緣生之言是也但多謂猶之豫狐之疑耳
說文又謂豫亦獸名未知其審若以豫爲獸名則猶
豫狐疑之文疑字是承上三獸而言也讀者詳之

鳳凰受詒

王逸以爲屈子思得賢智之士如鳳凰者受已之禮

遺將行就聘簡狄恐帝嘗已先我得之也朱子辯證
曰誤矣密爾則高辛何由而先我哉正謂已用鳩鳩
而彼使鳳凰其勢不敵故恐其先得之耳又或謂以
高辛喻諸國之賢君亦非文勢瑗按朱子之說是矣

二姚

朱子辯證曰留二姚亦求君之意舊說以爲博求衆
賢非是瑗按屈子求春官之處妃有娥之佚女有虞
之二姚與謂闐闐之天帝一也皆求君之意舊說非
是朱子屢辯之矣但逐條散見瑗因總綴其說於此
使讀者一覽而前後數章易貫通焉二姚事出左傳

已載前泥澆事條下

理弱

瑗按前吾令蹇脩以理朱子集註曰令蹇脩致佩纒以爲理則蹇脩似是下女之能爲媒者然亦未有考也然朱子雖以蹇脩二字無所考而以理字卽爲媒字矣思美人曰令薜荔以爲理因芙蓉以爲媒抽思曰理弱而媒不通此曰理弱而媒拙屈子每每以理與媒對言則理者亦媒之別名也無疑矣此處又依五臣註曰恐道理弱於少康以爲道理之理甚謬

蔽美稱惡

前曰世溷濁而不分兮好蔽美而嫉妬此曰世溷濁而嫉賢兮好蔽美而稱惡是卽前言而再申之而少變其文耳此蔽美一作蔽善非是字相似而訛也洪氏曰惡去聲言可美者蔽之可惡者稱之蓋惡當如字讀協作去聲耳直以去聲讀之亦非也瑗按惡如字讀而固字協作孟子其溷也可立而待也之溷音亦可又曰屈原作此在懷王之世恐亦無據也

閨中二句

王逸曰言君處宮殿之中其閨深遠忠言難通指語不達自明智之王尚不能覺悟善惡之情高宗殺孝

已是也何況不智之君而多闇蔽固其宜也洪氏曰
閨中旣以邃遠者言不通群下之情哲王者又不寤者
言不知忠臣之分懷王不明而曰哲王者以明望之
也太史公所謂莫幸君之一悟俗之一改也韓愈琴
操云臣罪當誅今天王聖明亦此意朱子曰閨中深
遠盖言處妃之屬不可求也哲王不寤盖言上帝不
能察司闇壅蔽之罪也言此以比上無明王下無賢
伯瑗按三說之意俱善而朱子之說尤體帖得旨但
王逸以上句爲忠言難通下句爲不寤善惡之情洪
氏以上句爲不通群下之情下句爲不知君臣之分

稍覺支離欠穩蓋不通者此情也不寤者亦此情也
不必如此太分上句指其居下句指其人互文以見
意耳又朱子以處妃之屬爲比賢君而舊說之非辯
證屢言之矣此又云以比下無賢伯亦非是也

懷朕情二句

王逸曰言我懷忠信之情不得發用安能久與此闇
亂之君終古而居乎意欲復去也洪氏曰此言當世
之人蔽美稱惡不能與之久居也朱子曰使我懷忠
信之情不得發用安能久與此闇亂嫉妬之俗終古
而居乎意欲復去也瑗按王逸以闇亂言之獨指其

世也洪氏以蔽美稱惡言之獨指其人也雖其意可相通不若朱子無二者而言之始該而盡也

終古

洪氏曰釋文古音故九歌曰長無絕兮終古九章曰去終古之所居終古猶永久也考工記註曰齊人之言終古猶言常也集韻古音估者故也音故者始也朱子集註曰終古者古之所終謂來日之無窮也辯證曰或問終古之義曰開闢之初今之所始也宇宙之末古之所終也考工記曰輪已庠則於馬終古登陁也註曰終古常也正謂常如登陁無有已時猶釋

氏之言蓋未來際也。瑗按近代盱江何喬新《周禮集註》云：終古登陞謂終年如登陂陁。莊子《大宗師》篇曰：維斗得之，終古不忒；日月得之，終古不息。崔氏註曰：終古，久也。然則終古者，常久之義也。備觀諸家之說，可知矣。然其言亦各不同，不可執一論也。如《九歌》九章及莊子之所言終古，是舉天地之終而言也；考工記之言終古，是舉馬之終而言；何盱江以終年釋之，是矣。若離騷之所謂終古，是舉已之終而言，猶曰終身云耳。言此惡俗不能與之終身，常久而處也。學者觀書隨文會意可也。此雖無繫大義，余懼學者執朱

子開闢之說則於此章之言終古有滯而不通者矣
故詳其說焉

葍茅

王逸曰葍茅靈草也洪氏曰葍音瓊爾雅云蒿葍茅
註云葍蒿一種花有赤者爲葍瑗按瓊玉之赤色者
也故葍之花赤而因借以名焉文選作瓊茅盖未嘗
觀爾雅又因王以靈草釋之故改爲瓊字以爲美名
之釋耳後漢方術傳引此亦作瓊茅俱非也屈子之
意但只言取草以爲占無取於草之靈如易之所言
菁草之有德者比也又按尚書禹貢荊州貢有包匭

菁茅記曰菁茅有刺而三脊所以供祭祀縮酒之用
既包而又匣之所以示敬也易大過初六曰籍用白
茅无咎朱子本義曰白茅物之潔者孔子小象曰籍
用白茅柔在下也是孔子之意重在茅是柔物而白
字帶言耳朱子本義重在白字上非是若禹貢之所
貢茅蓋取諸潔也或曰屈子取茅蓋以爲占之於神
也亦無取其潔乎曰既索葺茅以爲占自然是其潔
淨之物不待言矣但屈子立言之意只謂索草爲占
不重在神靈潔淨字樣上說者不必以靈以潔釋之
可也取草作占其術至今尚存或信手取草而長短

折之以擲之於地而觀其縱橫以爲兆或取草而齊折之置之於几縱橫推盪之以成卦先君東山先生嘗傳其說或謂之茅草數又謂之茅草卦想此術非獨楚俗爲然蓋其來已久卜筮者流以此代揲著之煩耳然王逸又謂結草以卜未知其法何如也

筵筭

王逸曰筵小折竹也楚人名結草折竹以卜曰筭文選註作小破竹也後漢方術傳序筵筭作挺專註曰挺專折竹卜也楚辭曰索瓊以筵專註云筵八段竹也楚人名結草折竹曰專瓊按漢書引王註又作八

段竹也蓋八段竹無義理八段二字當是小破二字之訛也或曰蓋折竹作八段以爲八卦而占之如今之靈棊經以十二枚靈棊子所爲也今之逸本作小折小破字者俱錯也然未知其是否大抵此二字乃卽今神廟中所抽竹箴所擲校杯之別名耳皆竹爲之者也故皆從竹頭也對上芟茅二字平看王逸以芟茅二字爲結草之占以筵字爲折竹之占以箴字爲楚人占卜之名甚謬矣或曰孰爲箴孰爲校曰今無所考未可知也然五臣曰筵竹箴也柳子天對云折箴刻筵午施旁豎折之爲言絕也刻之爲言削也

筵漢書亦作挺詳其字義或者筵爲箴而箴爲梭乎
靈氛

王逸曰靈氛古明占吉凶者是以靈氛爲古人之名
字耳恐無所據未必然也或屈子之設言如惜誦篇
厲神之號或古者巫祝之通稱或當時楚俗之言不
可知也蓋靈者贊美之詞如靈脩之靈氛者天地間
紛擾細縕之遊氣也說文曰氛祥氣也一曰禳妖氣
也故後世詩家有曰清氛曰紫氛曰塵氛曰妖氛等
號也蓋巫祝者所以掌鬼神者也鬼神之靈氣恒服
之故以靈氛稱之歟或靈氛者卽指鬼神爲天地間

之靈氣而因以名巫祝也王逸直以爲古之明吉凶之人則非矣

占

占之說詳見易繫辭并朱子啓蒙茲不暇贅王逸曰言已欲去則無所集欲止又不見用憂懣不知所從乃取神草竹筵結而折之以上去留使明智靈氛占其吉凶也其意固是而未盡也屈子前此遠遊亦久矣經歷亦遍矣因上下四方求索而無所遇故使靈氛占之不知還終當有所遇合否也若其占吉而終有所遇合當再遠遊以求之若其占凶而終無所遇

合則亦止焉而已矣此屈子命占之本意也故靈氛
既占而以兩美必合之吉占告之而復勸其遠遊也
王註獨以爲卜其去住之理而失屈子命占之本意
故曰未盡也

占慕

朱子曰此章占之慕之兩之字自爲韻瑗按慕下爲
亦慕可協作叅謁之叅音與占爲韻也或曰占與上
句箠爲韻慕與下有女句爲韻釋汝與故字爲韻未
知其審

兩美必合

朱子辯證曰兩美必合此亦託於男女而言之註直以君臣爲說則得其意而失其辭也下章孰求美而釋汝亦然至說豈惟是其有女而曰豈唯楚有忠臣則失之遠矣其以芳草爲賢君則又有時而得之大率前人讀書不先尋其綱領故一出一入得失不常類多如此幽昧眩曜二句乃原自念之辭以爲答靈氛者亦非是瓊按前以處妃美女之屬比賢君託爲男之求女以喻已之求君朱子之說是也至若芳草蓋又是以之而喻美女所謂比中之比而舊註直以爲君朱子以爲得之亦未之深詳也幽昧眩曜二語

王逸五臣俱以爲原答靈氛之詞是矣朱子辯之以爲原自念之詞非是蓋世幽昧以下至申椒不芳十句皆原答靈氛之詞若欲從靈氛之吉占心猶豫而狐疑二語乃原自念之詞也或曰男固可以求女女不可以求男屈子設爲男求女是矣至若君可以求臣臣不可以求君屈子之喻不亦倒乎由此言之則屈子遠遊之意全非矣固哉高叟之爲詩也惟其執此義而不通故說者徃徃以同姓無可去之理言之固哉高叟之爲詩也

孰信脩而慕之

此句言孰有忠信脩潔之士而人不慕之者乎猶詩
言不豈不也意見言外語直而意婉古人多有此文
法也蓋言美女之慕美男猶美男之慕美女也賢君
之求賢臣猶賢臣之求賢君也同聲相應同類相求
氣機之感召理勢之自然也此所以爲申言兩美必
合之意王逸以爲楚國誰能信明善惡脩行忠直欲
相慕及者乎朱子以爲楚國孰有能信汝之脩潔而
慕之者俱非文勢

故宇

王逸曰故宇故居也以爲屋宇之宇是也洪氏曰宇

一作宅若作宅則與下韻協朱子曰待洛反尚書周禮古文宅度多通用也蓋以爲故度猶言故態也亦非文勢

眩曜

洪氏曰眩一作眩眩日光也其字從日眩目無常主也其字從目並熒絹切淮南云嫌疑肖象者衆人之所眩耀朱子曰眩目無主也是從耳目之目旁王逸曰眩曜惑亂貌詞亦鶻突不明瑗按當從洪本作日月之日旁者是也幽昧是謂世人之昏暗險詐機械之巧僞蔽於中不能誠信者也眩曜與炫耀字同是

謂世人之喜炫爛誇耀致飾於外而不能好脩者也
正與前信脩二字相反靈氛言占兆之吉而信脩之
士決爲人所向慕而必有所合可以遠去也屈子答
以舉世幽昧眩曜不喜信脩孰能察已之美而慕之
以有合乎王逸五臣皆謂此屈子答靈氛難去之意
也是矣若作目之眩曜惑亂不能別白美惡亦通不
如作眩曜有照應得屈子立言之本意也孰云察余
之美惡惡字帶言本謂世無知己之美也古人多有
此類讀者幸毋滯焉美惡二字又承前好蔽美而稱
善而察况篇中屢言美字意亦相喚一作善惡非是

黨人

此與前惟黨人之偷樂之黨人同但前獨指楚國之黨人此則泛指一世之黨人以答靈氛思九州之博大何所獨無芳草之意然屈子亦不言九州無美女芳草但數黨人好惡獨異猶前世溷濁而不分好蔽美而嫉妬世溷濁而嫉賢好蔽美而稱惡不責其君而責左右之意也王逸曰黨鄉黨謂楚國也洪氏曰黨朋黨謂令尹子蘭大夫子椒之徒也王註固失之迂而洪註又失之隘也

服艾

朱子辯證曰楚人以重午插艾於腰豈其故俗邪瑗按今俗重午無論男女皆服艾於首或插之於門故有艾虎懸門之說非獨楚俗然也然未有插之於腰者豈插於腰者獨楚俗也其俗不知其所始要之其所從來也遠矣今世以爲始於屈子則非也

蘇糞壤

王逸曰蘇取也洪氏曰史記樵蘇後爨蘇謂取草也又淮南子曰蘇援世事蘇猶索也觀此則蘇字之義可知矣壤王逸曰土也糞字無註諸家俱無解蓋以其易明也要之亦是二物不可以爲糞之壤耳或曰

橘頌篇蘇世獨立之蘇字亦當與此同義未知其審
容更詳之

充幃

充蓋謂緼著充滿於香囊之中也王逸獨曰充猶滿
也詞欠斟酌又曰幃謂之騰騰卽今之香囊也幃音
暉騰音騰五臣亦以爲香袋瑗按香囊又謂之容臭
洪氏曰爾雅云婦人之褙謂之褙註云卽今之香纓
也褙邪交落帶繫於體因名爲褙瑗按或以爲香囊
或以爲香纓蓋香纓乃泛指纓絡而言香囊者纓絡
中之一物耳或曰幃古帷通蓋謂帷裳也謂蘇取糞

壤以爲帷裳之服飾也然糞壤又但可以爲囊袋之
支而非可結以爲佩者或曰喻言耳未知其審姑誌
其說以備後訂

理美能當

王逸曰理美玉也相玉書言理大六寸其耀自照言
時人無能知臧否觀衆草尚不能別其香臭豈當知
玉之美惡乎五臣曰豈能辨玉之臧否而當之乎朱
子曰豈能知玉之美惡所當乎瑗按諸家之說當字
俱未是朱子之意是以當字訓值也謂玉之美惡其
價所值有高下也五臣之說又鶻突欠明王逸之說

似矣而未也蓋此當字乃擔當之當謂任也能當猶
言堪任也謂覽察草木尚且不知香臭况玉之美惡
疑似之間尤所難辨豈堪任此職乎言其斷不識玉
也理美言玉之美者註皆以玉之美惡釋之惡字帶
言耳一曰理佩珩也洪氏曰理美猶九章言蓀美也
非是又按羅鄂州爾雅翼曰嘗試論之楚辭取象於
草木之芳潔者無所不備而君子比德於玉乃獨畧
焉王逸章句曰行清潔者佩芳德仁明者佩玉能解
結者佩觿能決疑者佩玦故孔子無所不佩也詳屈
平之意蓋以清潔一介自處自仁明以下皆所不敢

居焉故其言曰覽察草木其猶未得兮豈瑾美之能
當以言楚之君臣於草木臭香猶未能別而况能知
玉之美耶此所以有所詳有所畧瑗按羅氏之說非
也此所謂瑾美者屈子蓋以之自喻也至於何瓊佩
之偃蹇衆愛然而蔽之折瓊枝以爲羞精瓊塵以爲
糝雜瑤象以爲車鳴玉鸞之啾啾齊玉軌而並馳被
明月佩寶璐遊瑤圃食玉英同糝玉石一概相量懷
瑾握瑜窮不知示陸離之長劔崔嵬之峩冠芳澤雜
糝屢見篇內且自言重仁襲義重之脩能孰謂屈子
仁明以下有所不敢居乎孰謂肯以清潔一介而自

處乎其知屈子也亦淺矣其視屈子也亦小矣何其
觀書之畧而議人之疎也哉

靈氛吉占二句

洪氏曰靈氛之占於異姓則吉矣在屈原則不可故
猶豫而狐疑也朱子辯證曰補註以爲靈氛之占勸
屈原以遠去在異姓則可在原則不可故以爲疑而
欲再決之巫咸也考上文但謂舉世昏亂無適而可
故不能無疑於氛之言耳同姓之說上文初無來歷
不知洪何所據而言此亦求之太過也瑗按朱子此
說極得本旨讀者毋忽

巫咸

王逸曰巫咸古神巫也洪氏曰書序云伊陟贊於巫咸前漢郊祀誌云巫咸之興自此始說者曰巫咸殷賢臣一云名咸殷之巫也說文曰巫祝也古者巫咸初作巫山海經曰巫咸國在女丑北又曰大荒之中有靈山巫咸巫卽巫盼巫彭巫姑巫真巫孔巫抵巫謝巫羅十巫從此升降淮南子曰軒轅丘在西方巫咸在其北註云巫咸知天道明吉凶據此則巫咸之興尚矣商時又有巫咸也莊子曰鄭有神巫曰季咸又有巫咸招皆取此名璦按招魂帝告巫陽句王逸

註曰女曰巫陽其名也洪氏引山海經曰開明東有巫彭巫抵巫陽巫几巫相巫履註云皆神醫也王逸於此不詳所以但曰神巫也而又詳釋於招魂是亦畧耳今以山海經諸巫觀之則以陽爲名者是也而咸亦當作巫之名無疑矣然以咸爲殷之賢臣是也以爲始於殷者亦非也書序曰伊陟相太戊亳有祥桑穀共生於朝伊陟贊於巫咸作咸又四篇太戊贊於伊陟作伊陟原命史記天官書曰昔之傳天數者高辛之前重黎於唐虞義和有夏昆吾殷商巫咸周室史佚萇弘於宋子常鄭則裨竈在齊甘公楚唐昧

趙尹臯魏石申觀史記以巫咸與重黎等號並稱及書序伊陟問之以災祥之事則巫咸乃掌天文之職爲占卜之官也明矣淮南之註是而山海經註以爲神醫者非也夫巫祝之興也尚矣觀山海經所言諸巫也多矣奚獨巫咸之名之著也蓋巫之爲官肇自先王其來也遠莫究其始而巫咸之在殷則以賢能而顯故後世喜稱之焉惜乎咸又四篇與伊陟原命不傳於世遂使致治之道性命之理不白於天下也如羿之爲官肇自先王而後世之言善射者但稱有窮后羿卽其顯著者名之耳故莊列之所稱神巫季

咸要非殷之巫咸而屈子之所稱巫咸盖借殷之巫咸以爲天之巫咸而降於楚者也據莊子直以巫咸爲鄭人列子曰有神巫自齊來處於鄭命曰季咸是又似以爲齊人而寓於鄭也史記正義曰巫咸殷賢臣也本吳人冢在蘇州常熟海隅山上然旣以巫咸爲殷商太戊之臣則吳越至春秋時方入中國安得有蘇人仕於太戊之朝乎其說非也其所傳者妄也或曰莊列之所謂季咸非指殷之巫咸也季者少也盖齊鄭之神巫自以爲其術之妙如巫咸故因自命爲季咸其說亦通又按男曰覲女曰巫顏師古曰巫

覲亦通稱是也楚辭之所言巫者皆通稱之巫也王
逸朱子皆以女曰巫釋之非是易曰用史巫紛若論
語曰人而無恒不可以作巫醫觀此則巫覲通稱也
審矣

夕降

夕謂且夕也猶言早晚將下來耳朱子曰言巫咸將
以日夕從天而下是也王逸五臣皆以夕直作夜字
看洪氏曰夕降者神降多以夜陳寶之類是也俱非
是從朱子之說爲長又按百神翳其備降所以申巫
咸將夕降句九疑續其並迎所以申懷椒糝而要之

句皇剡剡其揚靈言神降而顯其威靈告余以吉故
言已要神而得吉兆也看楚辭須要如此照應方有
得處若徒汜濫而以詞華視之亦無甚味也

懷要

懷包藏也如陸績懷橘之懷言豫先包藏此物候巫
咸降而獻享以要之也要猶邀也如孟子使數人要
於路之要謂中道要截之而使爲已卜占也

椒糈

王逸曰椒香物所以降神糈精米所以享神五臣曰
糈米也洪氏曰糈祭神米也孟康曰椒糈以椒香米

餽也。瑗按王逸以椒爲降神之物，以糝爲享神之物，似是謂以椒投於酒中，使其氛香以降神也。然九歌中有曰：椒漿者，朱子曰：漿者，周禮四飲之一，謂以椒漬其中，取其氛芳以饗神也。則此言椒糝者，蓋以椒爲飲湯，以糝爲餽飯，皆所以饗神者也。王逸有降神饗神之分別，亦無害於義。但屈子此所言神，謂神將自降而於中道，便以要之，非謂自己要神之降下也。朱子取逸說，姑從之，但亦不可不知所謂巫咸將夕降者，非屈子致其降也。猶言巫咸早晚將從此過，我嘗邀之，使爲我占卜耳。孟康之註，似又謂以椒入米

爲香糯也其說亦通此等俱無明證亦無大害憑讀者擇之亦不可不知其詳也至若糯五臣曰米也亦是洪氏又曰祭神米也夫椒糯之物本人之所用而因以之祭神耳豈獨祭神之米而後可以謂之糯哉故糯從米則謂之飯滑從水則謂之酒是滑糯古人爲酒飯之通稱也久矣豈獨祭神云乎哉五臣之註予多所採取蘇東坡乃謂五臣固陋小儒不如李善後人遂每執蘇說以譏五臣是俗所謂矮子觀場好惡隨人衆口而已實未嘗有所見也東坡之說予蓋未之深信焉

翳

翳謂翳然其盛也對下九疑續之續字看王逸曰翳
 蔽也意亦是但又直解作蔽日下來非也夫翳然備
 降則遮天蔽日之意自在言表而直以翳為蔽日之
 蔽未穩也其意蓋本九歌靈之來兮蔽日也未是又
 備降即言百神齊來便是上言巫咸此言百神巫咸
 百神之所依言巫咸即指百神舊註又謂巫咸得已
 椒糝則將領百神來下亦非是前言椒所以降神糝
 所以享神是矣此又以椒糝為要巫咸之物巫咸得
 已飲食而領神來何自相矛盾也讀書須要融活不

可固滯如此可也

九疑並迎

王逸曰九疑舜所葬也洪氏曰漢紀曰望祀虞舜於九疑張揖曰九疑在零陵營道縣文穎曰九疑半在蒼梧半在零陵顏師古云疑似也山有九峰其形相似水經云峯秀五郡之間異嶺同勢遊者疑焉瑗按春陵圖志九疑山亦名蒼梧山一曰朱明峯二曰石城峯三曰石樓峯四曰娥皇峯五曰舜源峯六曰女英峯七曰蕭韶峯八曰桂林峯九曰杞林峯聳然於群峯之間望之大概相似茲其所以爲九疑乎李太

白遠別離曰九疑連綿皆相似重瞳孤墳竟何是觀
顏說與李詩九疑之義著矣一作疑者非是後人所
增耳其山跨蒼梧零陵之間故或言舜葬蒼梧或言
舜葬九疑可相通也已見前蒼梧條下茲不贅但此
屈子所言九疑者無取於舜之事也特取九疑山之
山神耳蓋謂天神既降已遂使九疑山之土神往迎
而要之以爲已占卜也王逸以爲舜使九疑之神紛
然來迎已知己之志也朱子從之失之遠矣並迎者
謂使九疑之神並往迎天之百神也與上懷椒糈而
要之句相發明也

迎故

朱子曰迎魚慶反叶音御是以爲親迎之迎音也然親迎之迎音與故韻協亦未詳其所以按懷沙篇曰重華不可選句朱子曰選一作選五故反史作悟洪云當作選音忤與迂同逢迎之意也然則此迎字或當作選迂字方與故韻協字相似而義通所以訛耳未知其審姑誌其疑以俟博雅

皇

皇卽指百神也猶篇首言朕皇考曰伯庸下曰皇覽揆余於初度只言皇而不言考者承上章省文耳王

逸曰皇皇天也言皇天揚其光靈使百神告我當去
朱子辯證曰皇卽謂百神不必言天也得之矣

升降上下

王逸曰上求明君下索賢臣五臣曰上謂君下謂臣
朱子辯證曰升降上下謂上君下臣者亦謬說集註
曰升而上天下而至地也言升降上下而求賢君與
我皆能合乎此法度者如湯之得伊尹禹之得皋陶
始能調和而必合也朱子獨以君言是也洪氏曰升
降上下猶所謂經營四荒周流六漠耳不必指君臣
其說更明白

求合

求矩矱之求是勉屈子遠逝以求君也嚴求合之求是言人君以求臣也四句相喚講言苟遠逝以求君則必爲君所求之而有合也讀者審諸

臯陶

王逸曰禹臣也朱子曰舜士師也按臯陶實爲舜士師而後亦爲禹臣也此言湯禹嚴而求合從王說爲是古人之言隨其所用不必拘也朱子總註又曰如湯之得伊尹禹之得臯陶前後雖互見使初學小童讀之亦不能無惑也

能調

下一調字隱然有都俞吁咈之風有成有一德志同道合之意曰同曰合曰調其義一也而調字尤妙王逸五臣俱以調和陰陽言之失之遠矣又調協音同與同爲韻朱子曰詩攻車之五章有此例瑗按詩曰決矢旣飲弓矢旣調射夫旣同助我舉柴蓋飲與柴協調與同協以首尾二句爲韻中連二句爲韻天問雄虺九首四句用此法也

行媒

王逸曰誠能忠心好善則精感神明賢君自舉用之

不須左右薦達也。按精感神明一句是暗指下武
丁。夢傳說事五臣註除此一句是矣。朱子集註復用
之非也。此二句且宜泛講而所引傳說事巫咸恐亦
不指夢言也。况上下所引又未必皆因夢而得用者。
但只言自己能脩道德則賢明之君自當知而舉之。
不必屑屑自己令媒命理以往求之所以釋前屈子
理弱媒拙之憾也。求矩矱之所同是告其直當自去
求可也。何必用夫行媒言不必借人力以求之也。苟
吾道之果是雖自往求又何傷乎。況古人如伊尹臯
陶傳說呂望甯戚諸賢聖又皆不必用夫行媒而亦

自往求之乎又况古之聖賢諸君如湯禹武丁周文
齊桓亦方且在上嚴而求合也乎言自古君臣相求
之急而相須之殷往往得合不必媒也此巫咸立言
之意也若待夢而求合則古之君臣其相合者亦少
矣其得合也亦難矣或曰若太公之鼓刀甯戚之謳
歌猶有以求之者若伊尹臯陶傳說肩嘗有求之之
事耶曰孟子嘗言之矣曰吾聞其以堯舜之道要湯
未聞以割烹也林氏註曰以堯舜之道要湯者非實
以是要之也道在此而湯之聘自來耳猶子貢言夫
子之求之異乎人之求之也學者觀此說則可以知

巫咸告屈子中情好脩何必用媒之意矣奚必以夢
言之乎巫咸之意曷嘗指夢之事乎亦指夫道焉而
已矣不然鼓刀之技謳歌之聲奚足以動周文齊桓
也周文之時其鼓刀者亦衆矣齊桓之國其謳歌者
亦衆矣何獨二子之得舉也蓋必有當夫周文齊桓
之心者矣既有以當夫周文齊桓之心則彼此之相
合際會之遭逢蓋有莫知其然而然者矣雖謂二子
有求於周文齊桓可也雖謂二子實未嘗有求於周
文齊桓亦可也不然鼓刀謳歌之藝奚足以求之乎

傳說操築

王逸曰傳說抱道懷德而遭遇刑罰操築作於傅巖武丁思想賢者夢得聖人以其形像求之因得傳說登以爲公道用大興爲殷高宗也書序曰高宗夢得說使百工營求諸野得諸傅巖作說命是佚篇也五臣曰說賢人代胥靡刑人操築於傅氏之巖武丁夢得賢相因使刻所夢之形求得說於傅巖委任之不疑洪氏曰孟子云傳說舉於版築之間史記云武丁卽位思復興殷而未得其佐三年不言政事決定於冢宰以觀國風夜夢得聖人名曰說以夢所見視群臣百吏皆非也於是廼使百工營求之野得說於傅

險同中是時說爲胥靡築於傳險見於武丁武丁曰
是也得而與之語果聖人舉以爲相殷國大治故遂
以傳險姓之號曰傳說史記徐廣註曰尸子云傳巖
在北海之洲正義曰地理志云傳巖卽傳說版築之
處所隱之處窟名聖人窟在今陝州河北縣北七里
卽虞國號國之界又有傳說祠孔安國曰傳氏之巖
在虞號之界通道所經有澗水壞道常使胥靡刑人
築護此道說賢而隱代胥靡築之以供食也瓊按王
逸不見古文尚書故曰是佚篇也今尚書說命上篇
云王宅憂亮陰三年旣免喪其惟弗言恭默思道夢

帝賚予良弼乃審厥象俾以形旁求於天下說築傳巖之野惟肖爰立作相蔡氏註曰審詳也詳所夢之人繪其形象旁求於天下築居也今言所居猶謂之上築肖似也與所夢之形相似於是立以爲相夫王逸之說是以傳說遭遇刑罰而爲胥靡之徒以操築也孔安國與五臣之說是以傳說代胥靡而操築也史記說爲胥靡築於傳巖之文又可兩解如爲字讀作平聲是說自爲胥靡也如爲字讀作去聲是代胥靡也諸家無音釋未知其審由孔安國之註觀之似當讀作去聲也要之操築者乃貧賤者之事爲人傭

保作工耳豈必胥靡刑人而後操築哉如梁鴻隱於
會稽而爲人撻卽其類也孔安國澗水壞道常使胥
靡築護之說亦因傳說在虞虢之界而附會之者耳
孟子曰傳說舉於版築之間蓋版者卽今之築土墻
兩邊之夾版也築者以杵而擣之之謂也蔡氏註尚
書以築爲卜筮之築謂居也以蔡氏之意推之則孟
子之所謂版築者乃詩之所謂版築衛門禮記所謂
蓬戶甕牖之義耳恐未必然也孟子旣曰版築屈子
又曰操築則爲操版以築土也明矣或曰劉向九歎
離世篇曰筐澤瀉以豹鞞兮破荆玉以繼築王逸注

曰築木杵也以築爲木杵於孟子版築之文二字並作實看尤好不又觀尚書本文高宗是夢見傳說之形象而書序及史記又以爲并其名字而夢知之若既得其名則詔天下之名爲說者皆赴闕廷一審之得矣又何必使百工營求俾以形旁求於天下邪又尚書註以爲繪其形象而求之五臣註似又是謂使木雕刻其形象以求之而尚書本文又只言審厥象俾以形詞亦欠明白也或曰遭刑而爲胥靡或曰代胥靡而築或曰夢見形象或曰夢見名字或曰繪其形象或曰刻其形象要之高宗夢說之一事亦爲孟

浪之言流俗相傳之語已不足信矣紛紛諸說又何足辯乎或曰然則尚書亦非乎曰非也古文尚書乃東晉梅賾之僞書而書序決非聖人之所作先儒闢之詳矣又何足據以爲信乎孟子屈子之所言者蓋已明白而簡易矣本謂傳說由側陋而登庸自貧賤而富貴耳舜在虞野玄德升聞以匹夫而見知於天子自古有之矣奚必夢之是徵邪高宗之夢傳說好事者爲之也或曰奚爲載之經而于載傳誦莫之敢非也曰武王夢帝與我九齡之專甚爲可笑而禮記文王世子篇亦載之至今傳誦而莫之敢非也豈可

亦信之乎孔子嘗夢見周公嘗夢奠兩楹聖人未嘗無夢若高宗之夢帝賚良弼武王之夢帝賜九齡皆夢之誕者也故曰盡信書不如無書誠確論也

傳巖

傳者姓也其巖乃傳氏之所居故因號之傳巖如今之以姓氏而爲村落鄉黨之名者多矣史記乃曰遂以傳巖姓之號曰傳巖是謂說本不姓傳而因以地名爲說之姓以寵之耳其說非也若謂傳說所居之處本不號傳巖高宗因得傳說而遂號其地曰傳巖如漢書載鄭玄之事因鄭玄之德行而遂號其鄉曰

鄭君鄉之類猶通也傳巖之號或高宗寵之或後人稱之或本來之名今無所考皆不可知要之以爲因傳巖而賜姓傳則非也此雖無係文義大害而學者亦不可不知也

呂望鼓刀

王逸曰呂太公之氏姓也太公避紂居東海之濱聞文王作興而往歸之至於朝歌道窮困因自鼓刀而屠遂西釣於渭濱文王夢得聖人於是出獵而遇之遂載以歸用以爲師言吾先公望子久矣因號爲太公望或言周文王夢立令狐之津太公立其後帝曰

昌賜與明師文王再拜太公亦再拜太公夢亦如此
文王出獵見識所夢載與俱歸以爲太師也洪氏曰
天問云師望在肆昌何識鼓刀揚聲后何喜王逸註
曰言呂望鼓刀在列肆文王親往問之呂望對曰下
屠屠牛上屠屠國文王喜載與俱歸戰國策云太公
望老婦之逐夫朝歌之廢屠文王用之而王註云呂
尚爲老婦之所逐賣肉於朝歌肉上生臭不售故曰
廢屠淮南子曰太公之鼓刀註云太公河內汲人有
屠~~之~~之困瑗按惜往日曰呂望屠於朝歌九辯曰太
公九十乃顯榮兮誠未遇其匹合史記齊世家曰太

公望呂尚者東海上人其先封於呂尚其苗裔也本
姓姜氏從其封姓故曰呂尚蓋嘗窮困年老以漁釣
于周西伯西伯將出獵卜之曰所獲非龍非螭非虎
非羆霸王之輔於是周西伯獵果遇太公於渭之陽
與語大悅曰自吾先君太公曰當有聖人適周周以
興子真是邪吾太公望子久矣故號之曰太公望載
與俱歸立爲師或曰太公博聞嘗事紂紂無道去之
游說諸侯無所遇而卒歸西伯或曰呂尚處士隱海
濱西伯拘姜里散宜生閔天素知而招呂尚呂尚亦
曰吾聞西伯賢又善養老盍往焉三人者爲西伯求

美女竒物獻之紂以贖西伯西伯歸與呂尚陰謀脩德以傾商政故天下三分其二歸周者太公之謀計居多文王崩武王卽位十一年將伐紂卜龜兆不吉風雨暴至群公盡懼唯太公強之遂以正月甲子斬紂於鹿臺武王已平商而王天下封師尚父於齊營丘註云譙周曰姓姜名牙嘗屠牛於朝歌賣飯於孟津索隱曰牙是字尚是名太公望是文王號之後武王號爲師尚父尚父官名也劉向別錄曰師之尚之父之故曰師尚父父亦男子之美號也呂氏春秋云太公釣於茲泉遇文王酈元云磻溪中有泉謂之茲

泉卽太公釣處今謂之凡谷東南隅有石室蓋太公所居水次盤石釣處卽太公垂釣之所其投竿跪餌兩膝跪跡猶存是磻磈之稱也說苑云呂望年七十釣於渭渚三日三夜魚無食者望卽忿脫其衣冠上有農人者謂望曰子姑復釣必細其綸芳其餌徐徐而投無令魚駭望如其言初下得鮒次得鯉刺魚腹得書書文曰呂望封於齊望知其異齊望曰太公望少爲人壻老而見棄去屠牛朝歌賃於棘津釣於磻溪文王舉而用之封於齊余嘗備觀諸書所載呂望出處多有異同而名姓之註亦無一定之說大

抵呂爲封姓是也姜爲本姓是也牙字卽古之雅字
通用尚書有君牙篇是也曰牙曰尚或字或名今無
所考亦難懸斷若尚父者蓋如哀公之誅仲尼曰尼
父桓公之尊管仲曰仲父索隱以爲官名非也曰師
尚父者蓋因文王立以爲師故無稱之耳古之聖王
多學焉而後臣之則師者卽周禮師傅之官而曰師
爲官名可也曰尚父爲官名不可也詩曰維師尚父
是也說苑言太公釣魚時已得書有呂望封齊之文
則太公窮困時已名爲望矣而謂文王號之可乎然
太公者卽師父之意而望之與尚其音相近而義相

通或卽爲太公之名後世流傳之訛也旣曰九十顯
榮則遇文王時已老矣故或以師父稱之或以太公
稱之太公者因呂尚之年老而稱之者也若從史記
之說則太公者乃謂文王之祖耳此蓋不知望字爲
太公之名而因附會其說也或曰賣飯或曰屠牛或
曰釣魚或曰爲婦所逐此乃貧賤窮困或曾備嘗艱
苦如舜之耕稼陶漁多所經歷而朱買臣亦有見棄
於妻之事皆無足怪也但據孟子以太公伯夷並稱
則太公者亦聖之清者也則嘗事紂之說游說諸侯
之說求美女獻紂之說以漁釣于西伯之說彼此交

夢之說皆好事者爲之也或曰然則太公何由而遇
文王文王何由而知之也曰古之君子出處亦必有
道大意已見前傳說條下吾不能鄭重天問曰師望
在肆昌何識鼓刀揚聲后何喜其闕之之意深矣或
曰屈子旣闕之而屢用之何也曰屈子但言其貧困
如此耳未嘗謂因鼓刀於肆而揚聲以干文王也上
屠下屠之說後世因鼓刀二字而妄益之者如國
策之所謂廢屠蓋謂太公道之不行而廢棄爲屠者
耳註不解其意遂有肉上生臭不售之說是太公之
事當初相傳亦本不如此而因註者以意度解多所

錯誤又人又輾轉流傳而粉飾之故不勝其說之紛紜焉

甯戚

王逸曰甯戚衛人脩德不用退而商賈宿齊東門外桓公夜出甯戚方飯牛叩角而商歌桓公聞之知其賢舉用爲客卿洪氏曰淮南子云甯戚欲干齊桓公困窮無以自達於是爲商旅將任車以商於齊暮宿於郭門之外飯牛車下望見桓公乃擊牛角而商歌桓公聞之曰異哉歌者非常人也命後車載之三齊記載其歌曰南山矸矸與岸同一作粲白石爛生不遭堯與

舜禪短布單衣適至飢從昏飯牛薄夜半長夜漫漫
何時旦桓公召與語悅之以爲大夫瑗按桓公無夜
出郭外之理雖出而仗衛扈從之盛甯戚又安敢遽
然而厲聲以歌之使之聞之邪豈春秋戰國之世多
有此事歟要之甯戚非傳說呂望之倫而桓公又非
殷宗周文之比屈子亦姑仍舊說而引用之耳無他
考據不暇深辨此上三人朱子辯證曰傳說太公甯
戚皆巫咸語補註以爲原語非也瑗按王逸註頗欠
明白洪氏自湯禹以下皆爲屈原語不獨此三子也
朱子亦未之深考或偶錯誤其言耳其說蓋本諸五

臣五臣只以勉升降以上下求矩矱之所同二句爲
巫咸語也甚非文勢謬矣

未央

王逸曰央盡也朱子從之洪氏曰說文云央久也詩
曰夜未央瑗按詩曰夜如何其夜未央又曰夜如何
其夜未艾朱子集註曰央中也艾盡也嘗觀屈子此
章上句是言其既往之年歲尚未至於遲暮將來之
時光方至而未遽已互文也是解作盡者近之而說
文之訓非也吾故嘗曰說文之說亦不可全以爲據
此類是矣

鷓鴣

王逸曰鷓鴣一名買鷓常以春分鳴言鷓鴣先春分
鳴使百草華英摧落芬芳不得成也以喻讒言先至
使忠直之士蒙罪過也五臣曰鷓鴣以秋分前鳴鳴
則草木凋落不芳香也喻讒臣爲言以害忠良洪氏
曰反離騷云徒恐鷓鴣之將鳴兮顧先百草爲不芳
顏師古云鷓鴣一名買鷓一名子規一名杜鵑常以
立夏鳴鳴則衆芳皆歇思玄賦云恃知己而華予兮
鷓鴣鳴而不芳註云以秋分鳴李善云臨海異物志
鷓鴣一名杜鵑至三月鳴晝夜不止服虔曰鷓鴣一

名鷓伯勞也順陰陽氣而生按禽經云鷓周子規也
江介曰子規蜀右曰杜宇又曰鷓鳩鳴而草衰註云
鷓鳩爾雅謂之鷓左傳謂之伯趙然則子規鷓鳩二
物也月令仲夏鷓始鳴說者云五月陰氣生於下伯
勞夏至應陰而鳴詩曰七月鳴鷓箋云伯勞鳴將寒
之候也五月則鳴幽地晚寒左傳趙伯氏可至也註
云伯勞以夏至鳴冬至止陸佃埤雅云陰氣至而鷓
鳴故百草爲之芳歇廣韻云鷓鳩關西曰巧婦關東
曰鷓鳩春分鳴則衆芳生秋分鳴則衆芳歇未詳朱
子集註曰鷓鳩卽詩所謂七月鳴鷓者蓋鷓鷓聲相

近又其聲惡陰氣至則先鳴而草死也辯證又曰鷓
鳩顏師古以爲子鳩一名杜鵑服虔陸佃以爲鷓一
名伯勞未知孰是然子鳩以三月鳴乃衆芳極盛之
時鷓以七月鳴則陰氣至而衆芳歇矣又鷓鷓音亦
相近疑服陸二說是瑗按王逸五臣比喻之說非是
已見集解茲不復贅至若鷓鷓之鳴或以爲春分鳴
或以爲立夏鳴或以爲秋分鳴或以爲春分秋分皆
鳴洪氏所引徒麗雅而無辨朱子辯證又疑信而相
半此鳥雖不知其的爲何物要之謂秋分鳴者是也
楚辭中凡嘆芳草零落者多以霜降爲言以此例推

之則鷓鴣之鳴屈子以爲先秋鳴而衆芳歇也明矣
王逸之意是以芳字解作花字謂此鳥鳴則百草之
花落而不芳矣其說雖通要非屈子本意屈子之言
芳草早殀者多於秋冬不於春夏也遍考之可見不
暇枚舉至若曰鷓曰鷦曰鷦曰鷦也曰鷦曰鷦曰鷦
曰鷦也皆聲音相近而字畫相疑或各人所授不同
或傳寫之訛耳曰伯勞曰伯趙曰巧婦曰買鏡此又
其別名也曰子規曰杜鵑曰杜宇曰雋周自別是一
物解者之誤洪氏曰子規鷓鴣二物也是矣

偃蹇

前曰望瑤臺之偃蹇註曰高貌此曰何瓊佩之偃蹇
註曰衆盛貌九歌東皇太一篇曰靈偃蹇兮姱服註
曰美貌可見古人用字不拘而解者不當執一也不
能盡舉讀者隨文會意可也

蔽折

朱子曰蔽如字卽折叶音制蔽音繫卽折音哲瑗按
蹇贅撤等字皆從敝則凡從敝者或可讀爲蔽音或
可讀爲繫音或可讀爲繫音隨所用韻轉音耳不必
協也古人謂一字有數音是也又折字亦有二音如
孟子爲長者折枝之折音哲在物乃攀採之名在人

事則爲摧挫之義故諺語曰折磨折孽是也如易經
爲毀折之折音舌在物乃斷絕之名在人事則爲敗
毀之義王逸註曰必欲折挫而敗毀之也是蕙二義
而解之朱子獨曰折毀敗也又不當音哲矣然折音
者未折音之稱折音者既折音之稱其義雖畧相同
而亦當有別也姑誌其疑以俟知者

蘭芷變而荃蕙化

洪氏曰上云謂幽蘭其不可佩以幽蘭之別於艾也
謂申椒其不芳以申椒之別於糞壤也今日蘭芷不
芳荃蕙爲茅則更與之俱化矣當是時也守死而不

變者楚國一人而已屈子是也瓊按此說朱子採之
附於集註其說雖善而未盡也蓋前謂幽蘭不可佩
申椒其不芳是言小人謂椒蘭不芳不可佩服在人
物上說則是謂君子之不可用在義理上說則是謂
道德之不可行以見小人原不知美惡之分好惡之
正也此謂蘭芷變而不芳荃蕙化而爲茅是言當世
之好人原號爲君子者本知美惡之分好惡之正而
其初亦有志向有意趣者後來見舉世小人得肆其
欲而已獨偃蹇不進遂舍其所學而學焉王逸曰言
君子更爲小人忠信更爲佞僞也是矣洪氏之說似

欠明白

茅蕭艾

五臣曰茅惡草洪氏曰蕭艾賤草朱子仍之瑗按惡賤二字分別亦無謂不如總釋之曰惡賤之草也淮南曰膏夏紫芝與蕭艾俱死則蕭艾爲惡賤之物也久矣洪氏又曰顏師古云齊書太祖云詩人采蕭蕭卽艾也蕭自是香蒿古祭祀所用合脂蕤之以享神者艾卽今之灸病者名旣不同本非一物詩云彼采蕭兮彼采艾兮是也瑗按蕭艾之爲二物也甚明洪氏之辨得之矣又比芳草爲蕭艾芳草卽指上蘭芷

荃蕙四物而曰不芳曰爲茅曰爲蕭艾參錯互文也
王逸上言君子更爲小人忠信更爲佞僞是矣此又
云言明智之士今皆佯愚狂惑明智之士雖即可君
子忠信之士不當復別立名字也

莫好脩之害

王逸曰言士人所以變曲爲直者以上不好用忠正
之人害其善志之故也五臣曰明智之士佯愚者爲
君不好脩潔之士而自損害洪氏曰時人莫有好自
脩潔者故其害至於荃蕙爲茅芳草爲艾也朱子曰
世亂俗薄士無常守乃小人害之而以爲莫如好脩

之害者何哉蓋由君子好脩而小人嫉之使不容於當世故中材以下莫不變化而從俗則是其所以致此者反無以如好脩之爲害也東漢之亡議者以爲黨錮諸賢之罪蓋反其詞以深悲之正屈原之意也辯證又曰莫好脩之害二註或謂上不好用忠直或謂下不好自脩皆非是瑗按好脩二字卽前苟中情其好脩何博蹇而好脩獨好脩以爲常等類一也王逸五臣以好爲人君好尚之好非是而朱子之解亦頗覺牽強洪氏之說則近之矣豈可亦以爲非乎蓋此二句不過總承上章言君子之所以中變爲小人

者無他故也只因不肯好脩故其弊至於如此爲茅
爲蕭艾而不芳耳莫猶不肯也害猶弊也其詞甚簡
易明白又何必深求之也哉

余以蘭爲可恃以下十二句

此下十二句卽上章之意而反覆言之者耳舊註以
爲司馬子蘭大夫子椒二人名朱子辯其非是得之
矣今見本章集解下茲不贅而椒專佞以慢悞椒又
欲克夫佩幃二句又當串講蓋謂椒本芳烈之物今
亦變專佞慢悞者而欲化爲椒以求克夫佩幃耳以
爲世之所用者椒也而已則椒也烏得不變爲椒以

求用於世邪此小人干進務入之心而中材之君子亦復如是也朱子註亦欠斟酌使覽者不豁然也

化離

朱子辯證曰化與離協易曰日反之離不鼓缶而歌則大耋之嗟則離可爲力加反又傳曰通其變使民不倦神而化之使民宜之則化可爲胡圭反服賦庚子曰斜史遷以斜爲施此韻亦可考瑗按易韻若以離爲主如字讀則歌協音歌嗟協參差之差若以歌爲主如字讀則離協音羅嗟協切磋之磋此化離二韻亦可兩協也若以離如字讀則化當協音爲易之

化與宜協是也若讀離作羅則化當協音訛也蓋訛亦作譌字是化與爲或古通用但今不可考耳嗚呼自科斗變而爲大篆大篆變而小篆小篆變而爲隸書爲草書爲楷書其字畫之舛誤者不可勝言矣此所以協韻之不能盡考其說也

委厥美而歷茲

王逸曰歷逢也茲此也言已內行忠正外佩衆芳此誠可貴重不意明君棄其至美而逢此咎也意一作遭洪氏曰上云委厥美以從俗言子蘭之自棄也此云委厥美而歷茲言懷王之見棄也朱子曰言瓊佩

有可貴之質而能不挾其美以取世資委而棄之以
至於此然其芬芳實不可得而減損昏暗此原之自
况也然上章譏蘭既有委厥美之文矣此美瓊佩又
以爲言者蓋彼真棄其美之實以從俗此則棄其美
之利以徇道其事固不同也故彼雖苟得一時之勢
而惡名不滅此雖失其一時之利而芬芳久存二者
之間正有志者所當明辨而勇決也瓊按朱子之說
是謂屈子不矜誇炫耀其才能之美以求知於人意
其言甚爲警策大有益於學者然於此章本旨則頗
覺牽強不順王洪二註得之矣但獨指君言固失之

滯而以爲子蘭者亦非也辯已見前矣蓋上云委厥
美以從俗是言世之君子棄其椒蘭芬芳之美以從
世俗之繽紛此云委厥美而歷茲是屈子自言已有
瓊佩之美而爲黨衆夔然而蔽之嫉妬而折之其棄
之一至於此也大抵何瓊佩至此一段一氣講下首
尾相應惟茲佩四句與上何瓊佩四句相應固世俗
二句與上世繽紛二句相應覽椒蘭二句雖結蘭可
恃以下八句而蘭芷變以下六句亦在其中矣此可
見離騷文章之妙也豈特華藻之豔麗而已哉惜乎
千載以來知之者鮮也

沫

王逸曰沫已也言已所行純美芬芳勃勃誠難虧歎久而彌盛至今尚未已也洪氏曰沫音昧微晦也易曰日中見沫招魂曰身服義而未沫朱子此解曰沫昏暗也招魂又曰沫與昧同是從洪說瑗按二說俱通但易豐卦日中見沫註曰沫小星也蓋星小則昏暗而難見難見者而日當中天且見之則豐其蔀甚矣觀此則作昏暗解於義尤切姑從之或曰旣沫爲昏暗小星而日當中天且見之則非昏暗之義也曰此反說之詞也蓋星本夜見而日不能見而沫之小

星尤難見者尤難見者而見之非當昏暗之時能之
乎曰日當中天者正見不宜昏暗而反昏暗不當見
星而反見小星以見昏昧之甚也

和調度

王逸曰言我雖不見用猶和調已之行度執守忠貞
以自娛樂五臣曰度法度也洪氏曰和調重言之也
朱子曰調徒料反猶今人言格調之調度法度也言
我和此調度以自娛瓊按舊註以和調二字連解固
非而朱子之說得之矣但度亦卽如今人所謂度態
之度朱子從五臣以法度之度解之亦非是也

求女

朱子辯證曰王逸以求女爲求同志已失本旨而五臣又讀女爲汝則并其音而失也瑗按前曰哀高丘之無女求處妃之所在見有娥之佚女留有虞之二姚豈惟是其有女及此聊浮游而求女或言神女或言美女雖有不同然皆指男女之女寄意於君也朱子之說是矣舊註或曰求知已或曰求同志或曰求賢人與共事君未盡善也曰相下女之可詒又是指前所言神女之侍女卽指神女而言亦寄意於君所謂比中之比類也孰求美而釋女之女字則當讀作

汝與汝何博蹇而好脩之汝同古通用也衆女嫉余之蛾眉之女又指小人而言也其義已見各章今撮附於此蓋因此篇文字頗長使讀者一覽之庶幾展卷之間不致有疑惑之阻反復檢閱之勞也

余飭方壯

王逸曰言我願及年德方盛壯之時洪氏曰高余冠之岌岌兮長余佩之陸離所謂余飭之方壯也朱子曰余飭謂瓊佩及前章冠服之盛方壯亦巫咸所謂年未晏時未央之意瓊按九辨曰離芳藹之方壯王逸註曰去已盛美之光容也詞亦不別白五臣註曰

言去離芳盛之德方壯之年是亦以芳藹爲德方壯
爲年瑗詳此二句文勢方壯二字似卽屬上二字而
言耳蓋壯者盛大之意謂余飭之盛壯芳藹之盛壯
耳無所謂年也洪氏之說似是此意又不明言諸家
俱分年德兩意講頗覺支離然亦無害大義故集解
姑從衆說以俟後訂

周流觀乎上下

此上下卽前吾將上下而求索勉升降以上下之上
下也洪氏曰周流觀乎上下猶言周流乎天余乃下
也非是蓋周流乎天余乃下謂旣周流乎天無所遇

矣乃復下來而求之耳此則謂或上或下而遍觀以旁求之也稍有不同讀者不可不察

靈氛既告余以吉占

洪氏曰靈氛告以吉占百神告以吉故而此獨曰靈氛者初疑靈氛之言復要巫咸巫咸與百神無異詞則靈氛之占誠吉矣然原固未嘗去也設詞以自寬耳瑗按洪氏解獨稱靈氛者其意是而所謂屈子固未嘗去則非也今卽其文而前後反覆以觀之則屈子實有志於決去矣豈可強解以爲不去乎其說前後屢畧辨之矣茲不復贅讀者取屈子之書平心易

氣而詳觀之當自得之矣又曰巫咸與百神無異詞
蓋曰巫咸者百神之所依卽指百神也雖謂之曰巫
咸告以吉故可也以巫咸百神爲二亦非是

歷吉日

五臣曰歷選也洪氏曰上林賦云歷吉日以齋戒張
揖曰歷筭也朱子曰歷遍數而實選也瑗按王逸無
註其前喟憑心而歷茲註曰歷數也委厥美而歷茲
註曰歷逢也豈以爲此歷字或數或逢皆可通乎故
不釋也諸家之說意亦俱是集解姑從朱子之訓也

瓊枝之屬

朱子辨證曰卒章瓊枝之屬皆寓言耳註皆曲爲比類非也瓊按舊註瓊枝二句王逸曰言飲食香潔異以延年也五臣亦同洪氏引反離騷云精瓊靡與秋菊兮將以延夫天年是自揚雄已如此解矣可見前輩之讀離騷者皆求之太過也駕飛龍二句王逸曰言我駕飛龍乘明智之獸象玉之車文章雜錯以喻已德似龍玉而世莫之識也五臣曰飛龍喻道瑤象以比君子之德言我遠遊但駕此道德以爲車適道崑崙四句王逸曰言已至崑崙神明之山將遂升天披雲霓之蒼鬱排讒佞之黨群鳴玉鸞之啾啾而有

節度也五臣亦同發朝天津二句王逸曰言已朝發天之東津萬物所生夕至地之西極萬物所成動順陰陽之道且亟疾也鳳凰承旂二句王逸曰言已動順天道則鳳凰來隨我車敬承旂旗高飛翱翔翼翼而和嘉忠正懷有德也五臣曰鳳凰乘旂引路飛翔翼翼扶衛於已其說偶得之矣洪氏又闢之曰古者旂旗皆載於車上故逸以承旂爲來隨我車遠遊註曰俊鳥夾轂而扶輪是也五臣以爲引路誤矣瑗按洪氏闢之非是且曰俊鳥夾轂而扶輪又非扶衛之意而何行此流沙二句王逸曰言吾忽然遇此流沙

遂循赤水而游戲雖行遠方動以絜清自洒飾也蛟
龍梁津二句王逸曰言我乃麾蛟龍以橋西海使少
皞來渡我動與神獸聖帝相接言能渡萬民之厄也
脩遠多艱二句王逸曰言崑崙之路險阻艱難非人
所能由故令衆車使從邪徑先過以相待以見已所
行高遠人莫能及也不周左轉二句王逸曰過不周
者言道不合於世也左轉者言君行左垂不與已同
志也五臣曰左轉者君子尚左瑗按二說固非而左
字又當本作右字傳寫之訛耳屯車千乘二句王逸
曰車所以載已言君子以德自載亦如車焉聚千乘

者言道德之多並運於已所在可馳走以玉爲車轄者言從已者皆有玉德宜輔千乘之君也卽道千乘之國也駕八龍二句王逸曰八龍神智之獸駕八龍者言已德如龍可制御八方也載雲旗者言已德如雲能閏施萬物也五臣曰八龍八節之氣也言我所往皆與神遊故可御氣爲駕載雲爲旗也此上舊註朱子闢之是矣瑗亦不暇逐條詳辨今畧述其說於此使讀者一覽之亦以見諸家之註楚辭者大抵類此而朱子之讀楚辭爲得其指也嗚呼王逸以騷名家者尚且若是其他從可知矣或曰如子之言旣皆

無謂笑必瓊瑤象玉龍鸞鳳凰崑崙天津之云乎曰
非全無謂也不過寓言飲食之潔車駕之美仗衛之
盛衆遊觀之博遠耳不必如舊註比喻之太甚也豈
得曰全無謂乎朱子曰皆寓言耳謂之曰寓言者亦
有所寄也達觀者當自得之高叟之徒烏足以語此

羞

王逸曰羞脯也五臣同洪氏曰羞脩二物也見周禮
羞致滋味脩則脯也王逸五臣以羞爲脩誤矣朱子
曰羞進也以牲及禽獸之肉致滋味而進之也瑗按
禮記註曰羞籩豆之實也羞羞脩並言當有分別若

單言之亦可通用也故今人指牲肉酒肴之屬亦有庶羞之稱

精

王逸曰精鑿也五臣曰精禱也洪氏曰應邵云精細也又曰鑿音作精細米也左傳粢食不鑿瑗按論語曰食不厭精朱子註曰精鑿也此又曰精細米也蓋鑿字與五臣所謂禱字相類謂禱之椎鑿之耳欲米之精細者必鑿之禱之也蓋非精字之義人讀者自不察耳左傳所謂不鑿謂不待鑿之使精也非以鑿爲精也要之應邵曰細也近之矣然精字之義亦

隨其所用故布帛之密緻者謂之精工匠之能巧者
謂之精志向之專確者謂之精饒粥之潔淨者謂之
精米穀之純熟者謂之精讀者隨文會意可也但謂
飲食之精者而概以鑿字釋之恐未是也

糜

王逸曰糜屑也瑗按靡下從火當與糜爛之糜古通
用也逸說亦是洪氏曰糜音糜文選音靡作上聲讀
非也

糲

瑗按糲糧古多通用也詩曰乃裹餼糧孟子引之

作糧又曰師行而糧食則屈子之作糗者亦同無疑
矣一音張者非也王逸曰糗糧也朱子亦曰糗糧也
不曰糗與糧同糗與糧同亦失之矣王逸固多忽畧
不必深責又按芬至今猶未沫朱子註曰沫昏暗也
直至後招魂曰沫與昧同不註於前而註於後亦非
是蓋朱子註楚辭之時已六十二歲豈亦因年老而
又以楚辭非聖經之比故忽畧之歟

崑崙

王逸曰河圖括地象言崑崙在西北其高一萬一千
里上有瓊玉之樹也洪氏曰禹本紀言山高三千五

百餘里日月所相避隱爲光明也其上有醴泉華池
河圖云崑崙天中柱也氣上通天水經云崑崙墟在
西北去嵩高五萬里地之中也其高萬一千里河水
出其東北陬爾雅曰西北之美者有崑崙墟之璆琳
琅玕焉又曰三成爲崑崙丘註云崑崙三重故以名
云昔人引山海經西海之南流沙之濱赤水之後黑
水之前有大山名崑崙之丘其下有弱水之淵環之
又曰鍾山西六百里有崑崙山所出五水今按山海
經內崑崙墟在西北帝之下都方八百里高萬仞山
有水禾面有九井以玉爲檻面有五門門有開明獸

守之百神之所在郭璞曰此自別有小崑崙也淮南
子云崑崙墟中有增城九重上有木禾珠樹玉樹璇
樹不死樹在其西沙棠琅玕在其東絳樹在其南碧
樹瑤樹在其北東方朔十洲記崑陵卽崑崙中狹上
廣故曰崑崙山有三角其一角正東名曰崑崙宮其
處有積金爲墉城面方千里城上安金臺五所玉樓
十二神異經云崑崙有銅柱焉其高入天所謂天柱
也圍三千里圓周如削下有四屋仙人九府所治又
一說云大五嶽者中嶽崑崙在九海中爲天地心神
仙所居五帝所理凡此諸說誕實未聞也朱子集註

曰後漢書註云崑崙在肅州酒泉縣西南地之中也
辯證曰博雅曰崑崙墟赤水出其東南阪河水出其
東北阪洋水出其西北阪弱水出其西南阪河水入
東海三水入南海後漢書註云崑崙山在今肅州酒
泉縣西南山有崑崙之體故名之二書之語似得其
實水經又言崑崙去嵩高五萬里則恐不能若是之
遠當更考之爰按九歌河伯篇曰登崑崙兮四望王
逸曰崑崙山河源所從出洪氏曰山海經云崑崙山
有清河白河赤河黑河環其墟其白水出其東北阪
屈向東南流爲中國河爾雅曰河出崑崙墟色白所

渠并千七百一川色黃百里一小曲千里一曲一直
淮南曰河出崑崙貫渤海入禹所導積石山也天問
篇曰崑崙懸圃其居安在增城九重其高幾里王逸
曰崑崙山在西北元氣所出其巔曰懸圃乃上通於
天也又曰淮南言崑崙之山九重其高萬二千里也
洪氏曰淮南云崑崙墟中有增城九重其高萬一千
里百一十四步二尺六寸此蓋誕實未聞也朱子曰
崑崙據水經在西域一名阿耨達山河水所出非妄
言也別錄又曰水經云崑崙去嵩高五萬里看來不
會如此遠蓋中國至于闐二萬里于闐去崑崙無緣

更有三萬里文昌雜錄記于閩遣使來貢獻使者自言其西千三百里卽崑崙山今中國在崑崙之東南而天竺諸國在其正南大抵地形如饅頭其撚尖則崑崙也今按諸家所言崑崙不一朱子據博雅水經似以爲實有此山而不遠也旣爲不遠則必嘗有到矣然或云去鍾山西六百里或云去嵩高五萬餘里或云方八百里或云面方千里或云圍三千里或云高萬仞或云高一千里百一十四步二尺六寸或云高三千五百餘里或云高萬一千里或云高萬二千

里何所言高遠之不一也至若瑇瑁琅玕醴泉華池

九井五門沙棠銅柱於事理猶或有之也而珠樹玉
樹瓊樹璇樹碧樹瑤樹絳樹不死樹金墉金臺玉檻
玉樓木禾之類又何所產竒異之多乎然觀屈子天
問之言則明闢其無是山矣闢其無是山而曰遠道
崑崙曰登崑崙崑崙今四望曰憑崑崙崑崙以澄霧又引用不
一而足何也蓋天問乃窮理之言而此所引皆借以
爲寄興之詞耳固無害也要之爾雅水經山海經神
異經十洲記禹本紀淮南子河圖括地象諸所言崑
崙者皆如郭璞所云此自別有小崑崙也不然設使
去嵩高五萬里亦人所能到者而漢遣張騫窮河源

屢歲而不能達何也按漢張騫渡西海至大秦大秦之西烏遲國烏遲國之西復言有海西海之濱有小崑崙高萬仞方八百里朱子亦嘗曰張騫自是至小崑崙耳烏覩所謂大崑崙者哉或曰然則大崑崙其居果安在哉曰無所謂大崑崙也屈子之所用崑崙閩風懸圃神山卽如列子之所謂蓬萊方丈員嶠方壺諸山耳蓋雖有是名而本無是山假設其號以爲神仙清淨高遠之居也又豈真有所謂崑崙山者哉或曰以諸家之所言而朱子亦謂其實有是山非妄也子獨謂實無是山何也曰諸家之所言者雖道里

之遠近方闊之廣狹高下之尺寸不可知然實有是山也非妄也所以謂之實有者蓋因古者相傳崑崙之名而因以名其山耳非本來之所謂崑崙者也揚子太玄曰崑崙旁薄幽夫昆侖二字猶渾沌之義也蓋山之形勢極高極大磅礴無涯之稱猶今之所謂差我崔巍萃嶽龍嵒等字樣耳朱子曰山有昆侖之體故名之得其義矣三成爲昆侖之說中狹上廣之說意度之言耳於義不切也吾故嘗謂屈子之所用崑崙乃指本來相傳之崑崙非指諸家所言之崑崙也又按屈子所稱閭風懸圃亦本無是山而寓言耳

舊註并白水赤水等名皆解爲在崑崙山上之別號以此言之則前所謂闔闔者亦崑崙墟之門名也若然則屈子反來復去只在崑崙山側周流耳烏得謂之四方上下而求索乎其非是也審矣遍考此篇及後遠遊篇之所用地名或虛或實或有或無或天或地參錯互用覽者執一以求之則有不通者矣或曰觀諸家之說皆謂崑崙在西北之方若無其山何其言之相同若是也曰天地大勢西北高故多山東南下故多水是天下之山水其根源皆發自西北故言山之極高極大者而必曰西北焉由此言之亦可見

反至地之西極洪氏引上林賦左蒼梧右西極爾雅
西至於幽國爲西極淮南西極之山曰闔闔之門以
證之亦非是

旂

王逸曰旂旗也畫龍蛇爲旂洪氏曰周禮曰蛟龍爲
旂熊虎爲旗左傳曰三辰旂旗爾雅曰有鈴曰旂朱
子註從周禮之說瑗按旂旗固當有辨而屈子之所
謂旂者卽指上雲霓之旌旗耳舉一以見其餘也固
無取於蛟龍之旂有鈴之旂之類也讀者詳之

流沙

王逸曰流沙沙流如水也洪氏曰卽今西海居延澤是也後漢書郡國志曰居延澤卽古流沙張揖云流沙沙與水流也顏師古曰流沙但有流沙本無水也朱子曰沈括云嘗過無定河活沙履之百步皆動如行幕上或陷則人馬車馳以千數無孑遺者或謂此卽流沙也瑗按張揖之說非也餘說皆是又按此下二章皆言周流四極之意據舊說曰赤水者在東南方以水言也曰不周山在西北方以山言也或曰此四方舉四隅而言者以見其無所不到也雖然不如余集解泛言爲穩或曰前言白水春宮舉正東西二

方則南北在其中矣此言赤水不周舉正南北二方則東西在其中矣或曰上二章崑崙天津已指東西而言故此二章指南北而言互見也其說俱通姑備錄之

赤水

舊註據博雅言赤水出崑崙東南陬洪氏又引穆天子傳曰遠宿於崑崙之阿赤水之陽莊子曰黃帝遊乎赤水之北登乎崑崙之丘以此言之則實有赤水之名矣要之屈子所稱者自泛指南方之水耳不指崑崙山之赤水也或曰此以流沙並言之子解流沙

又從舊說爲實有是名而赤水與不周又泛言何也
曰虛實並陳固無害也前曰朝發軔於蒼梧實有是
名矣又曰懸圃曰咸池曰扶桑曰闔闔曰白水曰春
宮曰窮石曰洧盆曰有娥曰有虞則固已虛實有無
而並陳之矣則此曰崑崙曰天津曰流沙曰赤水曰
不周又何疑乎不特此也曰天帝曰處妃曰佚女曰
二姚其所訪求之人乃蹇脩鳩鳩之媒望舒飛廉豐
隆雷師鸞鳳凰鳥之使等類亦或虛或實或有或無
而並陳之矣惜乎舊註不能以意逆志而解之多牽
強也要之此篇所用懸圃闔闔風白水赤水不周皆泛

言耳與崑崙之所言者無相關也大意已見前崑崙
條下茲不贅

麾

王逸曰舉手曰麾或言以手教曰麾五臣曰麾招也
瑗按尚書牧誓曰右秉白旄以麾楊子法言曰在門
墻則麾之在夷狄則進之是麾者固有揮斥使退之
意亦有發縱指示之意屈子此所言麾者如書之右
秉白旄以麾之麾或以手或以物不可知也大抵麾
字雖虛亦可實用麾本旄旄之屬而持之以招搖者
也故麾字亦可與揮字通用其義可知矣其字從麻

從毛其物可知矣。應蛟龍以梁津，猶周穆王之越海，比鼉鼉以爲梁也，亦寓言耳。

不周

舊說謂不周爲山名。王逸曰：在崑崙西北。張揖曰：在崑崙東南二千三百里。洪氏據《山海經》、《淮南子》考之，當在西北。以王逸之說爲是，得之矣。但屈子所用不指崑崙之地，說已見前。又按立春曰條風，取其條暢之義，故亦曰融風。言融和也。與條義近。春分曰明庶風，言庶物之鮮明也。不獨條暢而已。立夏曰清明風，言清而且明也。夏風而曰清者，觀舜歌《南風》而謂其

可以解吾民之愠則夏風不獨薰然其和而已和之中有清者存焉故曰清明夏至曰景風景者大也故亦曰巨風言清明而至於大也立秋曰涼風取其寒涼之意秋分曰闐闐風闐古昌通大也闐者閉也言寒涼之風大而萬物閉藏也立冬曰不周風不猶詩言豈不也周遍也言天地之氣運至此而豈不爲一周乎冬至曰廣莫風廣者空曠之意莫古寞通謂寂寞也天地氣運旣一周遍則若無所用事亦惟空曠寂寞而已此說雖與諸家之說有同異而大意亦不外此學者可以類推矣是不周之名與春之條夏之

清明秋之涼同義其為北方之總名也審矣有不周
 山者後人因以其名而名其山耳猶閶闔風亦有云
 閶闔門閶闔宮也惜乎解者知其流而不知其源反
 謂西北之隅有山形缺而不合不相周匝因名之不
 周風自此山出故謂之不周風也以此言之則莊子
 所謂大塊噫氣其名為風豈可謂之大塊風宋玉風
 賦所謂怒發於土囊之口又可謂之土囊風乎然則
 餘者亦當有條山清明山涼山明庶山閶闔山景山
 廣莫山矣其不然也審矣或曰如子之言則不周亦
 西北之風而以為正北之風可乎曰可也如東風曰

條風又一日東北方曰條風南方曰景風又一日東
南方曰景風西方曰閶闔風又一日西北方曰閶闔
風淮南子亦旣以不周爲西北之風又曰開北門以
納不周之風是故或正或隅自古相傳各有不同雖
淮南子一人之書亦未有一定之稱也孰謂不周不
可以爲正北方之名乎或又曰天傾西北故因以不
周名西北之風亦恐未必然也

左轉

王逸曰左轉者言君行左垂不與已同志也五臣曰
左轉者君子尚左其說俱非矣洪氏曰遠遊篇歷太

皓以右轉在東方自左而之右故下云遇蓐收乎西皇也此云路不周以左轉不周在西北海之外自右而之左故曰指西海以爲期也瑗按洪氏之說亦非也遠遊篇所言蓋承上所叙曰南巢曰南洲而言謂自南方而將歷東方轉西方也故曰歷太皓以右轉遇蓐收乎西皇非遂始自東方來也烏得謂自左而之右乎其說牽強不通此所言者蓋承上流沙赤水而言謂自流沙之西循乎赤水之南取路乎不周之北而復歸於西焉亦宜曰右轉也作左轉者字相似而傳寫訛也下旣云指西海以爲期依舊說則赤水

亦在東南之方而左轉之則當先至西海而後至不
周之西北矣烏可謂路不周以左轉指西海以爲期
乎則當云路西海以左轉指不周以爲期矣解此者
皆未之思也不言東方者既曰自南方歷北方抵西
方則東方不言可知矣故曰路脩遠以多艱兮騰衆
車使徑待蓋言已將自南方轉東方又轉北方方歸
西海其脩遠如此故使衆車先從邪徑直往西海而
先去以候已也或曰路不周二句是謂衆車徑待故
曰左轉曰非也自南而西邪徑而行雖近乎左而非
左也大抵既指西海以爲期謂將息駕於正西之方

而不周又近乎北無緣復過西海而抵不周也王逸
曰言已所行之道當過不周山而左行俱會西海之
上旣曰從西北過不周會西海之上又烏得謂之左
行乎其不然也明矣又按塵蛟龍以梁津詔西皇使
涉予二句亦是命衆車先往徑待以豫告西皇之詞
言已將從東北而歸於西矣可使蛟龍梁津以渡已
庶幾周流至此得以速赴會期無阻隔之險逗留之
虞也

指

王逸曰指語也意是而詞滯此蓋謂以手指示衆車

方所言汝等先由徑路往至此處我將從東北右轉
周流而歸相會於此耳訓指爲語言之語於義不切

待期

朱子辯證曰待與期協易小象待有與之協者卽其
例也瑗按待字右傍爲寺寺字平聲讀作茲音則可
與期協期字左旁爲其其字讀作彼其之子記音又
可與寺字本音相協如詩經隅字讀作耦字與迓字
協是禹字古亦有耦音也吾嘗謂古人協字皆從旁
讀之便是試遍考之方知余言之非陋也其不以旁
讀者乃字畫之舛訛今不可考故耳或亦有假借轉

註之類也

屯

王逸曰屯陳也五臣曰屯聚也洪氏曰屯徒渾切瑗按五臣之訓是王逸非也此屯字讀如屯營屯兵屯田屯糧之屯音也其義亦同

鞞

王逸曰鞞錮也一云車轄也洪氏曰鞞音大方言云輪轄楚之間謂之鞞朱子曰鞞轄也轂內之金也一云轄也瑗按朱子亦並載其說蓋本無據難明也今考轄與館管同車轂端鐵也鞞在車輪之中外持轄

內受軸長三尺二寸徑一尺蓋輻湊之處以鐵爲之
取其磨而不磷也轄與鑄率同車軸頭鐵也亦以鐵
爲之王逸曰錮者以鐵言也然亦不知其所指爲轂
端之鐵邪軸頭之鐵邪此所謂玉者謂以玉代鐵耳
其所言軼或轄或轄無所考見要之以爲輪者非也
軼讀如否泰之泰音一讀如扶杜之扶音韻書兩見
音義亦與鈇同也

九歌九韶

王逸曰九歌九德之歌禹樂也韶九韶舜樂也尚書
簫韶九成是也洪氏曰周禮有九德之歌九韶之舞

啓樂有九辨九歌又山海經夏后開始歌九韶開卽啓也竹書云夏后啓舞九韶瑗按朱子從王逸之說是也以爲啓樂者妄也但韶樂擅於舜也無疑矣而所謂九辨者卽尚書所言九叙也尚書所言九叙九歌禹又推之於舜舜又推之於禹固亦可爲舜之樂而非禹之專稱也要之地乎天成六府三事允治禹之功居多而非舜能任之亦不克就也或曰屈子蓋惓惓致意於重華者也此所言九歌亦指舜樂言耳未知其審集解姑從舊說又按九德者謂六府三事也水火金木土穀六府也六者財用之所自出故曰

府正德利用厚生三事也三者人事之所當爲故曰
事合之而爲九也樂所以象德也故曰九德之歌書
曰水火金木土穀惟脩正德利用厚生惟和九功惟
叙九叙惟歌又曰六府三事允治是也九韶者猶書
言九成也九成者樂之九成也功以九叙故樂以九
成九成猶周禮所謂九變也孔子曰樂者象成者也
故曰成歌者歌詠之也言其聲也舞者舞蹈之也言
其容也然九德曰歌九韶曰舞蓋亦舉此以該彼互
文以見意也非九德不可舞九韶不可歌也讀者詳
之

假日

王逸曰言已德高智明宜輔舜禹以致太平奏九歌之德九韶之舞而不遇其時故假日遊戲愉樂而已洪氏曰顏師古云此言遭遇幽厄中心愁悶假延日月苟爲娛樂而已今俗猶言借日度時故王仲宣登樓賦云登茲樓以四望兮聊假日以消憂今之讀者改假爲暇失其意矣李善註仲宣賦引荀子多暇日亦承誤也朱子曰假工雅反借也一作暇一音暇皆非是瓊按悲回風篇曰借光景以往來與此句同則此作假借之假字無疑洪說是矣但屈子之所以歸

休西海之上奏九歌而舞九韶者蓋以爲周流四方
上下而旣無賢君之可遇於是乎退居林泉之下寂
寞之濱以樂吾道焉而已矣如伊尹耕於有莘之野
而樂堯舜之道焉之意所謂人知之亦囂囂人不知
亦囂囂非全出於中心愁悶而強排遣歲月耳故屈
子之言亦有極憂處亦有極樂處憂者憂世也樂者
樂道也古之諸聖賢莫不皆然則憂樂並行又何疑
於屈子乎又豈可盡以爲失志之詞窮苦之語乎顏
師古之言亦未盡善而王逸又謂言已之德宜輔舜
禹之說亦牽強也

陟陞皇一章

王逸曰言已雖升崑崙過不周渡西海舞九韶陟天庭據光曜不足以解憂猶復顧視楚國愁且思也又曰屈原設去世離俗周天而地意不忘舊鄉望見楚國僕御悲感我馬思歸蜷局詰曲而不肯行此終志不去以詞自見以義自明也五臣意同朱子曰屈原託爲此行而終無所詣周流上下而卒反於楚焉亦仁之至義之盡也瑗按後遠遊篇曰涉青雲以汜濫游兮忽臨睨夫舊鄉僕夫懷余心悲兮邊馬顧而不行與此語意同王逸註曰屈原謂脩身念道得遇仙

人託與俱遊周歷萬方升天乘雲役使百神而非所
樂猶思楚國念故鄉欲竭忠信以寧國家精誠之至
德義之厚也可與此章互看但以此章之亂辭及後
遠遊篇之末二句曰超無爲以至清兮與泰初而爲
鄰屈子畢竟是終於去意其此遠遊求訪賢君與後
遠遊求訪神仙固託詞以見其欲去也其此二篇之
二條顧而不行之語亦託言以見其不忍欲去也其
有不忍去之心卽君子仁之至義之盡也精誠之至
德義之厚也而畢竟終於去者此又君子大雅之明
保身之哲也孰謂屈子之不知此哉孰謂屈子之未

嘗去哉其拳拳致不忍去之意者以見去非本心也
去非本心而不得不去者其去固不在屈子也乃楚
王怒而逐之也不然屈子豈忘楚哉觀此一念不忍
去之心則屈子之忠可見矣奚必以不去爲忠以投
水而死爲忠哉屈子之賢固不在此而深知屈子之
心者亦不在此也以爲不去者以爲投水而死者皆
未嘗讀楚辭而信口耳相傳之說以註楚辭論屈子
者也學者試取屈子之書卽屈子之所自言反覆熟
讀而味之平心易氣而觀之要其指趣之所歸求其
立言之本意以意逆志不以詞害意則屈子果去乎

果不去乎果投水死乎果不投水死乎若泥口耳相
傳之言執先入之說以爲生則吾亦莫如之何矣雖
然後世雖尚其才華之美而未嘗有深留意於此書
者也使得與三百篇並行而大顯於世爲學者之所
傳誦多更儒賢爲之註釋則必有得其肯綮解其緘
滕發其扃鑰者矣嗚呼安得有如鄭康成者入吾室
操吾矛以伐我乎又按王逸此章之註承邇道崑崙
以下而言之其意亦是而未盡也蓋此章直承前駟
玉虬以下遠遊諸章而總結之者耳讀者詳焉

亂

洪氏曰離騷有亂有重是矣瑗按有亂者離騷也九章涉江也哀郢也抽思也懷沙也凡五篇有重者後遠遊一篇而已然又有歌詞有倡詞抽思篇是也又有問答之詞離騷篇惜誦篇卜居篇漁父篇是也以文體論之離騷遠遊二篇相類也九歌十一篇相類也九章橘頌自當別論餘八篇相類也卜居漁父二篇相類也天問一篇自爲一體其句法又模擬乎三百篇而少變者也此其大畧也若夫一篇之中有起結有鋪叙有照應而曲折妙處有非言之所能盡者學者熟讀而詳玩之當自得焉其宋玉二招蓋自離

騷遠遊二篇來特脫胎換骨耳至於九辨與東方朔
之七諫劉向之九歎蓋模擬乎九章者也王褒之九
懷王逸之九思蓋模擬乎九歌者也其文雖不及屈
子卽其體裁要亦各有所本焉朱子謂諫歎猶或粗
有可觀兩王則早已甚矣豈非以篇章之寂寥句法
之短促乎恐未盡然也

楚辭蒙引卷之下

楚辭考異

玉卿集考

孔子曰吾猶及史之闕文也左傳曰疑以傳疑古者於載籍有可疑而當闕者則因之不革存之不棄懼寢失其真也然自屈子著此辭以來千有餘年矣劉向校定之後訓解者十數家俱漫不復存無所取證予家所藏僅有東京王逸章句丹陽洪興祖補註及吾鄉先正朱子集註而已然其間文字多有異同雖三家於本章之下畧載其說彼此各有遺漏不能備詳故予於集解之內頗擇其文從字順意義明暢者而從之餘皆刪去不復綴之

於各章之下恐其繁蕪不便觀覽顧特已意所安亦未敢必以爲盡是故效朱子韓文考異並錄附于篇末且間以鄙意而是非之其無所是非者或兩可而俱通也以備讀楚辭者叅互而自選之若予仍有所未見而不及盡載者尚幸好古博雅君子當別求之諸本而益附之以輔吾之不逮云

離騷

皇覽揆余于初度兮

覽一作鑒一無于字

又重之以脩能

能一作態非是

紉秋蘭以爲佩

紉一作紐非是字相似而訛也

汨余若將不及兮 不一作弗

夕攬洲之宿莽 攬一作檻 一作擘 洲上一有中字 一作州 作州非是

日月忽其不淹兮 忽一作留

惟草木之零落兮 零一作苓

不撫壯而棄穢兮 一無不字 非是

何不改乎此度也 一無也字

乘騏驥以馳騁兮 乘一作棄 一作策 馳一作駢

來吾導夫先路也 導一作道 一無也字

豈維紉夫蕙蔭 紉一作紐 非是 蔭一作芷

何桀紂之猖披兮 猖一作昌 一作倡 一作褻 披一作被

夫唯捷徑以窘步 唯一作程

惟黨人之偷樂兮 惟下一有夫字

豈余身之憚殃兮 一無身字一作心字殃一作快字
俱非是

忽奔走以先後兮 忽一作習一作急

荃不揆余之中情 荃一作蕓揆一作察中一作忠

反信讒而齎怒 齎一作齊一作齎一作歎

忍而不能舍也 忍上一有余字一無而字一無也字

夫唯靈脩之故也 唯一作惟一無也字

曰黃昏以為期兮羌中道而改路 一本無此二句

後悔避而有他 避一作遁他一作佗

余既不難夫離別兮一無既字一無夫字

余既滋蘭之九畹兮滋一作蒔與栽同

又樹蕙之百畝畝一作晦

畦留夷與揭車兮留夷一作留夷揭一作藹一作藹

雜杜衡與芳芷衡一作蘅

冀枝葉之峻茂兮峻茂一作後赫

願俟時乎吾將刈俟一作俟

衆皆競進以貪婪兮以一作而

憑不厭乎求索憑一作馮

羞內恕已以量人兮一無已字

各興心而嫉妬 興一作與非是

夕餐秋菊之落英 餐一作食

長願頷亦何傷 頷一作領

擊水根以結茝兮 擊一作擊擊音覽擊啓妍反音異而義同也茝一作芷

蹇吾法夫前脩 蹇一作蹇

非世俗之所服也 世一作時非是避唐而改者後多倣此

哀人生之多艱 人一作民

又申之以攬茝 一無以字非是茝一作芷

終不察夫人心 人一作民

衆女嫉余之蛾眉兮 蛾一作娥非是

謹詠謂余以善淫

以一作之

固世俗之工巧兮

世一作時

饨鬱悒余侘傺兮

悒一作邑

吾獨窮困乎此時也

一無也字

寧溘死以流亡兮

以一作而

余不忍爲此態也

一無也字

自前世而固然

世一作代

何方圜之能周兮

圜一作圓周一作同

忍尤而攘詬

詬一作詢一作垢

回朕車以復路兮

回一作迴

退將復脩吾初服 一無復字

集芙蓉以為裳 集一作纂

忽反顧以游目兮 游一作遊

人生各有所樂兮 人一作民

余獨好脩以為常 脩一作循非是

豈余心之可懲 豈一作非可一作何俱非是

女須之嬋媛兮 須一作頰嬋媛一作揮媛

申申其詈予 詈一作罵予一作余

鮀悻直一亡身兮 鮀一作鮀一作鮀悻一作鮀亡一

終然歿乎羽之野 歿一作天

汝何博蹇而好脩兮

蹇一作蹇 蹇一作蹇

賚藁菴以盈室兮

賚一作茨

夫何斃獨而不予聽

斃一作斃 斃一作斃 斃一作斃

依前聖以節中兮

以一作之非是

喟憑心而歷茲

憑一作馮

就重華而陳詞

陳詞一作陳辭

五子用失乎家巷

巷一作街與巷同一作居非是

弄淫佚以畋遊兮

畋一作田

固亂流其鮮終兮

固一作國非是鮮一作歡

澆身被服強圉兮

澆一作冝服 冝一作於強圉 冝一作疆

縱欲而不忍

欲下一有殺字非是而一作以

厥首用夫顛隕

夫一作以一無夫字顛一作巔

后辛之菹醢兮

菹一作俎後做此

殷宗用之不長

之一作而

湯禹嚴而祗敬兮

嚴一作儼

周論道而夏差

差一作蹉

舉賢才而授能兮

一無才字

循繩墨而不頗

循一作脩非是頗一作陂

覽民德焉錯輔

民一作人

夫維聖哲之茂行兮

之一作以

相觀民之計極民一作人

玷余身而危死兮死下一有節字非是

不量鑿而正柄兮正一作進

增歔歔余鬱悒兮增一作曾悒一作邑

攬茹蕙以掩涕兮攬一作漑一作擘一作擊

跪敷衽以陳辭兮陳辭一作噉辭

馳玉虬以乘鷖兮虬一作蚪乘一作乘鷖一作鷖

溘埃風余上征溘一作埽

夕余至乎懸圃懸一作縣一作玄

欲少留此靈瑣兮少一作夕非是瑣一作環

望崦嵫而勿迫

崦嵫一作奄茲勿一作未非是

路漫漫其脩遠兮

漫漫一作曼曼

扈余轡乎扶桑

扶一作搏

聊逍遙以相羊

逍遙一作須臾相羊一作穰穰羊一作伴

鸞鳳為余先戒兮

風一作皇一作鳳先戒一作我前

雷師告我以未貝

我一作余

帥雲霓而來御

帥一作率霓一作蜺

時曖曖其將罷兮

罷一作疲非是

結幽蘭而延佇

而一作以

朝吾將濟於白水兮

於一作乎

登閬風而縹馬

縹一作緜

溘吾遊此春宮兮

溘一作盭

相下女之可詒

詒一作貽

吾令豐隆乘雲兮

乘一作乘

求處妃之所在

處一作宓

忽締繡其難遷

締繡一作徽攄 一作散攄 一作徽繡

朝濯髮於洧盤

盤一作槃

保厥美以驕傲兮

傲一作敖 一作驚

來違棄而改求

棄一作弃

覽相觀於四極兮

覽相一作求覽

周流乎天余乃下一作天乎一無乎字俱非是

見有娥之佚女佚一作妹

雄鳩之鳴逝兮雄一作鳩羽弓反一作鷓鴣呼故反

鳳凰既受詒兮凰一作皇詒一作詔非是

欲遠集而無所止兮集一作進非是

世溷濁而嫉賢兮世一作時非是

好蔽美而稱惡美一作善非是

閨中既以邃遠兮一無以字

余焉能忍而與此中古一無而字

索藟茅與筵蓐兮藟一作瓊與一作以俱非是

豈惟是其有女惟一作唯

勉遠逝而無狐疑兮一無狐字

孰求美而釋汝汝一作女

何所獨無芳草兮草一作艸

爾何懷乎故宇爾一作尔通用宇一作宅古文度字非是

孰云察余之美惡美惡一作中情美一作善俱非是

人好惡其不同兮人一作民

戶服艾以盈腰兮腰一作要

謂幽蘭其不可佩共一作兮一作之

覽察草木其猶未得兮一無覽字草一作艸一作卉猶一作獨非是

蘇蕙壤以充帟兮

以一作呂

九疑續其並迎

疑一作疑

勉升降以上下兮

升一作陞

求矩矱之所同

矩矱一作架護

湯禹嚴而求合兮

嚴一作儼

擊臯陶而能調

臯陶一作咎繇

又何必用夫行媒

一無又字

時亦猶其未央

其一作而

恐鷓鴣之先鳴兮

鷓鴣一作鷓鴣

使夫百草為之不芳

無夫字一無為字草一作艸

何瓊佩之偃蹇兮佩一作珮

惟此黨人之不諒兮諒一作亮

世續紛以變易兮世一作時以一作其

何昔日之芳草兮草一作艸一作卉

今直爲此蕭艾也莫好脩之害也一無蕭字一無二也字

椒專佞以慢慝兮慢一作謾一作漫一作媿慝一作

楳又欲充夫佩帑夫一作其非是

既于進而務入兮而一作以

固世俗之流從兮世一作時流從一作從流從又一作徒非是

又况揭車與江離揭一作葛離一作蔞

惟茲佩之可貴兮

之一作其

芳菲菲而難虧兮

而一作其虧一作虧

芬至今猶未沫

芬下一有復出芬字

歷吉日乎吾將行

一無吉字

精瓊靡一以為糗

糗一作糗一作糗

揚雲霓之晻霏兮

揚下一有志字非是霏一作霏

鳳凰翼其承旂兮

凰一作皇翼一作紛

高翱翔之翼翼

之一作而

麾蛟龍以梁津兮

以一作使

詔西皇使涉予

予一作余

騰象車使徑待

待一作持非是

駕八龍之蜿蜿兮

一作婉婉

載雲旗之委蛇

一作透迤一作委移

聊抑志而弭節兮

一無聊字

神高馳之邈邈

神高馳一作邁高地非是

聊假日以愉樂

假一作暇一音暇俱非是愉一作愉

陟升皇之赫曦兮

一無陟字升一作陞曦一作戲

僕夫悲余馬懷兮

悲一作忘非是

已矣哉國無人莫我知兮

一無哉字人下一有兮字

楚辭考異